

平橋江弟上人雅鑒

同学弟

陳熙績

於省懸

女祺乞

十月十七日

鄭植翁有寄
零草囑弟持

閣下情銷壹冊

此書無刻本願

難購大價空洋

壹元未報可

惠名此佈即請





張蒼水奇寒草

二老閱鈔本


史兆琳贈

張蒼水

見方

讀左遺集

二
現
高



二
現
高

奇零草序

嗚呼何天心久不定耶何狎於穢德開闢未三百年而日月復
晦蝕耶明室當再興著於圖籙非誣也其果有驗耶其終不可
問耶漢之中圯也春陵之氣鬱然而世祖名在讖緯遂協天符
諸葛公數出師北伐其自表曰成敗利鈍非所能逆睹然遺碑
秘記後世猶傳以為神則非不知也知其不可為而為之者也
江陵淪陷蕭梁遂亡王子珩以一州之力聲義抗旌雖兵敗身
奔益以復仇為事終不北面於陳君子哀其志焉南宋之沒文
謝諸公忠冠古今鄭所南作心史錮之井中三百餘年其書始
出書中猶言宋室中興有日則所南固不知宋之終亡矣夫興

亡天也亡而復興亡而不復興亦天也君子不恃乎天亦不阻乎天孔明所謂竭股肱之力繼之以死誠志士之準也虜馬南侵普天同仇死節之臣項背相望於今十有八年而鳩衆搆旗者猶可指數若栖遲山海漢臘周冠不染羶族之輩亦所在而有豈前代可及哉余於丁亥秋始與同年少司馬玄箸張子相見於昌國賦詩贈答啣杯抵掌曾無間晨夕其時以為中興大業指顧可定藩竿比發神州豪傑必有響應者師入洋子江登金陵山燿火通 孝陵題詩蘭若中此豈僅博浪沙一擊哉已亥之秋延平王以舟師取瓜步下京口而守之玄箸自以所部義從數千餘人舍舟登陸復姑熟宣州新安銅陵諸郡邑沿及

江以北歷陽皖口橫江諸險要大抵皆傳檄解綬無為虜堅守者會我師不戒蹶於金陵城下倉卒南還而玄箸方經營江北未之知也大勢奔潰聲援莫接於是幅巾芒屨混迹緇流夜行晝伏久之始達浙海復歸行營樹纛鳴角散亡乃集昔梁將陳慶之以兵八千北伐乘勝下元魏數十城直據洛陽其事與今相類兵燿間行得達江南亦與今相類蓋孤軍久駐兵法所忌然亦足以貶頑起懦震盪中原矣歲月飄忽今又二年江南北尚寂寂四七之讖為有為無張子雖欲枕戈將何所持以共大功近綴緝其所著詩名之曰奇零草而問序於余夫秉旄鉞以圖恢復者玄箸之志也馳翰墨以畢餘生者不肖遠之業也茲

乃輟軍務而留意於詩將無世事汗漫時以暇日勒為成編以俟後世之知也耶余聞詩能窮人又聞窮而後工於詩覽玄箸所作其氣宏偉而昌高其詞贍博而英多蓋明堂之圭璧清廟之賁鏞也長離一鳴世以為瑞况律呂之相宣乎夫氣有衰盛先動乎人聲取奇零草而絃歌之無待審音可比夔曠明室之再興於是乎可卜矣奚必覆揆前代之已事而為疑且信哉華亭年春弟徐亨遠題於思明之西埔寓時。○十五年歲在辛丑九月之望

奇零草卷上

明學士甬上張煌言玄箸父著

七言律

丁亥留節滄城同諸公行長至禮

幾年臥節夢金鑿綿蕞猶班舊握蘭葭管初開周甲子葱珩聊見漢衣冠
高呼恍覺爐香近海曙還疑扇影寒惟有臣心冰雪淨
逝將絲線續雙丸

九日陪安昌王黃肅虜虎癡張定西侯服張太傅鯢淵朱

太常聞玄徐給諫閣公及沈公子昆季登鎖山和韻

鼇背霜寒菊自開欣看萸佩宴吹臺尚書履近東山駐大將旗

言
聯西府回香冷金華雙使至秋明玉樹二難來
追陪誰復題
字媿向鑿坡問筆才

和肅虜侯黃虎癡承制頒曆韻

戊子

駿馭遙巡斷赭鞭孤臣頻歲紀星躔曉籌冷落鷄人唱寒管驚
回龍子眠舊放梅花知漢臘新添莫葉是堯年義熙何用陶潛
載日月中天正朗然

送黃金吾馮侍御乞師日本

中原何地足依牆惆悵徵師日出方龍節臥持笏客魚書泣
捧豹衣郎黃河北去浮青雀滄海東回獻白狼但聽無衣萬里
外繡弧應復挂扶桑

余自丙戌蹈海奉違家君定省已四載矣茲待罪軍旅每

一念至為之黯然

己丑

獵火年年急羽書飄零子舍竟何如不因閩外驚投袂那見庭
前嘆絕裾燕語空梁泥自落鷓啼細柳血應枯遙知今夜關山
月獨照龍鍾人倚闌

鐵衣何事換斑衣朔雪炎風歸未歸莫慰兒旣娛畫繡聊憑龍
盾報春暉停雲轉悔辭家易夾日還慙補國微記得青箱多舊
訓丹心玄髮敢相違

勸農遇雨時予屯兵山寨

濃雲似墨滯行旌點染春郊最有情話到桑麻風自古災餘草

木雨還生土龍不用胡僧呪竹馬偏喧稚子迎烟火幾家寥落
盡空山布穀一聲聲

答古虞偽令乃祖官尚書

漢幟年來半壁標何期賢令賦同袍睢陽自昔猶矐目彭澤於
今暫折腰好為家聲看魏笏還將國恥問蘇旄龍荒多少江南
客老皺胡顏說北朝

戊子元旦步張鮑淵太傅韻補錄

椒花幾度頒千春惆悵瞻雲尺遠臣海國尚留桑版舊山家又
見柳條新三年噫雪雙蓬鬢萬里乘風七尺身賴有老成遲
劍履相看端笏對楓宸

辛卯春暮張鮑淵相國招賞玉樓春向晚更酌漫賦

西江花事已闌珊春富名園色可餐香韻乍經羞後見風流恰
向醉中看不妨豔質偏叢綠却羨芳心自渥丹小雨疎窗遙望
斷輕綃低護絳雲團

看花相對數花籌綺谷偏宜清夜遊欲比酒容來葉底頻疑燈
影上枝頭粧殘蓮粉精神別夢入梨雲顏色浮暮靄迷離渾一
片湘簾挂處隱朱樓

端陽喜雨呈張相國辛卯

海國懸符為避兵驅來雷檄又縱橫中天雨露天中節半夜風
雲夜半晴繁露何須災異對商霖原為相公生憂民幸慰祈年

言不...
意笑把菖蒲泛酒鎗

弔威虜侯黃虎癡

百年心事總休論
墮淚憑看石上痕
竹帛早應傳魏勝
河山終不負劉琨
當時杖履知何在
此日衣冠孰孰存
一自將臺星隕後
胡塵天地尚黃昏

弔沈五梅中丞

香臺咫尺渺人琴
萬里寒潮送夕陰
報國千年藏碧血
毀家十載散黃金
名山難瘞孤臣骨
瀚海空磨戰士鐔
留得荒祠姓氏古
春歸惟有杜鵑吟

遊芥瓶菴贈希聞上人

斲入雲根便臥雲
禪棲真可鶴為羣
數竿便覺龍孫長
一徑斜從鳥道分
山是骨餘原太古
僧無肉相即斯文
膽瓶印處應如許
我亦來參得未聞

登菩薩頂

絕磴凌虛嵌佛龕
捫天拄笏恣豪探
蒼茫遠水橫空碧
歷亂羣峰倒鬱藍
雙屐俄從雲漢落
一卷幾與石梁參
如來肉髻應非幻
最上何須駕鶴驂

追輓屠天生

雉壇曾記探陰符
共挽天戈指羯胡
我似魯連還抗節
君為翟義竟捐軀
旄頭應避祁連冢
匕首空藏督亢圖
歸去延陵須挂

言不陸等
劍只愁零落是楷模

天生元配投繯殉夫臨終有詩

碧血流乾滄海塵深閨誰是未亡人曾聞脫珥都忘緯豈惜磨
筭並化燐苗女當慚珠未碎明妃莫怨玉難春臨危猶作離鴻
調字字遺丹在編巾

輓楊瑤仲廣文

澤國由來已墮天敢云補闕有青氈欲逃東海波難挽縱臥西
山薇亦羶屋上幾時曾集鵬堂前從此不升鱸相遭猶記言珍
重豈意歸吟薤露篇

輓華吉甫明經

魚檄纔傳身已危英魂烈骨任披離華夷兩字書生辨節義千
秋史氏知遊去玉樓堪作賦投來鐵匣尚留詩更聞鍛鍊神偏
壯慷慨如歌易水辭

輓楊立石侍御

即瑤仲之弟

避莽爭誇漢兩龔逋臣浩氣正如虹何期士雅鞭先著轉覺賓
王檄未工華表應歸千載鶴夜臺誰避五花驄獨憐江左風流
盡未黍依然滿故宮

侍御室人從容就義

何人重上望夫山血影模糊不可攀漆室有憂曾曳編崩城無
計竟投繯沉來婺彩光猶映揮到湘筠淚自斑多少鬚眉巾幘

態却留彤管嘆紅顏

輓董若思明經

昨夜貪狼炤越軍
蚤嗟玉折與蘭焚
孤臣錯擬清河客
力士空求滄海君
函谷丸泥封未得
豐城劍氣香難分
悲歌不獨為姻
姬雁影遙天奈失羣

輓王完勳

憶君被褐草間來
慷慨論兵未易才
薄海誰堪師畫邑
下江應許畫雲臺
星沈漢壘貪狼耀
風勁胡營戰馬哀
伏劍猶聞歌正氣
心懸陵母亦悲哉

輓馮躋仲

一夜烽烟薛畧原文星
早共將星昏埋肝尚擬扶宗社
灑血何從濺廟門
同穴先悲梁上燕
覆巢早泣峽中猿
只今大樹還零

落異域誰招馮母魂

躋仲妻縉子縵母被沒入故云

閏元宵限十四鹽韻

每惜春宵未可淹
天留倒景上元添
燈毬前度何時再
簫鼓平分此夜兼
靈雨故遲桃李候
香風仍入柳梅占
不愁曉箭相催急
只恐金吾令已嚴

輓張鯁洲相國

一身真可繫危安
垂死威儀尚漢官
魄返黃墟應化碧
顏留青史即還丹
千秋共惜遺金鑑
十載何慙戴鐵冠
也識公歸箕尾

上定依日月倍芒寒

紗籠姓氏迥無瑕晚節何如五柳家欲報君恩餘白髮祇留相

業在黃麻樓空燕子從風墮門冷龍孫帶雨斜先生諸姪同一

自墨胎歌斷後華亭鶴唳更堪嗟

輓大宗伯吳巒穉先生 先生吳江人

冰稜玉尺倚容臺一片孤忠天地哀儼爾鬚眉留四皓黯然誓

孛入三台引年難遂懸車去逐日徒悲化杖回深負先生歸骨

望吳江楓冷鶴歸來

一掌河山亦踐蹂老臣霜雪正盈頭掀髯猶抱滄桑恨扼吭甘

從孤竹遊自是澤宮堪薦俎先生畢命於學宮豈無夜壑可藏舟趨朝

當日稱先達惆悵生芻何處投

輓朱聞玄少宰

風流名節總相兼冰鑑高從北斗瞻老去漢臣猶避莽歸來陶

令未名潛一官直與夔龍並七尺甘隨虎豹殲試向星辰還聽

履炎輪應為返西崦

極目烽烟點鬢毛間關已溼雨難逃黍離社稷無薪膽草昧朝

廷有節旄自許孤忠遺海岸人悲啟事失山濤臨風不盡招魂

賦那忍重看舊佩刀

輓安洋將軍劉胤之

羽聲落日泣兵殘斗大孤城獨據難虎體拚隨朝露盡龍精空

向暮雲寒數奇偏少封侯骨力竭惟餘報主肝
歲歲芳洲暝草綠飛燐猶繞舊登壇

賦贈翁永年中翰燕爾之喜 壬辰

豔陽玉樹正堪攀一捻柔枝翠幙間賦就梅魂誰競爽
廣來柳絮自幽閒鸞回欲寫輕蛾樣燕婉偏諧小鳳班
最是流蘇春暖夜餘香擬傍御爐還

遊隆教寺

雲林次第望中收碧澗清泉曲曲流山勢有情留古寺
海潮無意到孤洲素冠獨許黃冠伍芳草渾同衰草愁
自覺行藏猶廓落五湖煙雨釣魚舟

遊小巖小庵

春郊彌望盡蒼煙選勝還探小有天筍發新篁饒玉版
花迷野菜似金鈿客來漸與山麋狎僧去惟留海鶴眠
堪笑阮生幾兩屐桃源總在亂峯前

閒居

揮手歸鴻望已乖風塵依舊兩芒鞋人居閒處非佳境
事到難時且放懷無限興亡看越絕何妨奇怪說齊諧
孤踪轉覺支離甚一任蒼苔自上階

沈彤菴閣學艤舟南日山遭風失維不知所之雖存亡未
卜余猶望其來歸也

昨夜驚濤勢轉雄，孤帆何處御長風。
沃焦不信膠舟解，博望初疑銀漢通。
欲問馮夷愁莫應，倘成精衛恨何窮。
哀歸當有支機石，豈遂騎鯨向碧空。

送萬靜齋復命行在

聞君攬轡向蒼梧，三月椰花媚客途。
星漢初回英蕩節，風流未減繡螭弧。
嶺梅見使懽相接，岸柳懷人強自扶。
莫怨胡塵連瘴雨，王師傳說下荆湖。

步答萬靜齋留別韻兼以勸駕

經旬客邸正相尋，君去應嗟逕草深。
帝子偏安猶半壁，王孫盡報只千金。
梁鴻自是難分手，范蠡何堪有隱心。
好向屬車勤獻

策楚才莫作楚騷吟

贈馬爾毓職方奉表行在後不果行

頻年北極未迴鑿，萬里朝宗行路難。
孝直終當扶蜀鼎，太真時亦奉劉丸。
乘風共聽尚書履，近日應隨御史冠。
此去君家銅柱在，長纓好請繫樓蘭。

擬別義陽王

紫橐玄戈事幾秋，傷心忠孝竟何酬。
投閒肯寄通侯廡，招隱空登學士舟。
滄海拂來唯兩袖，赤霄攜去有雙鉤。
月明倘下緱山鶴，準擬追陪伊雒遊。

我師圍漳郡，余過覘之賦以志慨

溟南見說築金臺長揖諸侯壁上來地險分明形似米天驕竊
據勢如菟愁登廣武論劉項倦向梁園逐馬放却聽雄風歸楚
望聊當飲至一卮盃

端陽客鷺門

偶逢南海菖蒲節轉憶西山薇蕨生風俗不殊鄉國異年華一
去夢魂驚何須繫縷為長命安得懸符盡碎兵客况淒其聊對
酒莫辜好景是朱明

夏日過鼓浪嶼飲程嶼嘉將軍署中

入林偏愛晚涼生灌木疎疎墮月明鶴夢到山原獨醒蟬聲繞
樹有餘清不堪歸興逢人急真覺炎趨較世輕相對素心聊一

醉盤飧何用五侯鯖

月夜同陳文生過黃粹伯留酌

為妒秋容愛晚行明河如練月初更當關忽報雙筇過入座先
驚一榻橫此夜冰壺堪濯魄誰家紈扇獨關情風流笑殺黃山
谷厨傳居然阮步兵

與蔡無能論興復

塵纓濯罷便投綸忽道風雲起孟津豈有龍文成五色猶然鹿
走在三秦赤符奉去應非謬黃石傳來自是真安得此身生羽
翰高擗橫擊待攀鱗

感遇

自憐錯節尚千盤信是人間行路難
落拓何曾誇馬骨淹留豈為戀猪肝
交遊亂後知誰在故老閒來傍若看
多少雄心空對酒能無清淚滴琅玕

相傳霸越有神山國破空留匹馬還
赤董純鈞難復鑄黃間勁弩似堪彎
此時始識通侯貴何事翻令傲客閒
總是是非千古定好將腐史手重刪

片石誰能砥亂流冠裳無計且依劉
未須名附青雲顯祇覺心同白石留
避地幸存周甲子論人漫著晉春秋
微軀慮向風塵老後死終慙清惠侯

別陳齊莫

偶乘越榜向南飛客夢驚回起拂衣
瀛海屢經龍戰後滄江漸見雁來稀
杜陵入蜀悲難去枚叟遊梁笑未歸
今夜刀頭明月滿臨歧那得竟忘機

舟次中秋

淡蕩秋光客路長蘭橈桂棹泛天香
月明圓嶠人千里風急輕帆雁一行
此夜啣盃慚庾亮幾年持斧笑吳剛
觀濤豈必錢塘去碧海銀潢自渺茫

夢內

到處青山足住家無端歸夢繞天涯
中宵細語蘋蘩節滿地離愁蘆荻花
約略刀環窺月影分明砧杵喚霜華
遽然一枕成何

事亂逐秋風向若耶

長至後傳王師出東粵志喜

土圭才見影初長忽報天聲出五羊始信玄陰銷北陸懸知赤
伏耀南荒金魚尚自唐分錫銅馬翻為漢辟疆此日孤臣淹漲
海衣冠拂拭待從王

步韻答徐閣公

窮途長日更難消賸有圖書伴寂寥霸業徒看秦望氣客愁似
瀉廣陵潮共歌叢桂山中發誰識焦桐爨下燒潦倒未應猶屈
強丈人久已學承蜩

舟次聽雨分得長字

小雨江天倍渺茫翩然有客度鳴榔坐來知己忘觴薄話到英
雄看劍長殘角分明悲澗渤孤篷展轉憶瀟湘相憐身世真飄
泊豈為春風欲斷腸

同姚興公萬美公過訪陳齊莫小酌

回首鄉關北海濱南來猶見故鄉人君因久客翻為主我亦同
仇况比鄰八載滄桑愁欲老一尊清酒話相親共悲吳楚烽烟
急太史星占正聚閩

書懷

一劍橫磨近十霜端然搔首看天狼勳名幾誤乘槎客意氣全
輕執戟郎圯上書傳失絡灌隆中策定起高光山河縱破人猶

在試把興亡細較量

同諸子步月

醉餘散步興盪飛挈伴耽看素月輝
濠濮自然成獨往關山幾處
炤人歸橫襟坐嘯風微至曳履行吟
星漸移稀清影自憐同鶴瘦可能肥
迺遂初衣

飲酒

世事驚心強自娛蕭條旅館日提壺
嘗言諸葛真名士猶作高陽一酒徒
座上何須分雅俗杯中原不入榮枯
且須杖策春陵去王粲登樓賦有無

感懷二首

滄江一臥已心灰避地何人賦七哀
欲遣新愁悟後去翻教往恨醉中來
六橋歸夢吹衰柳五月寒巖聽落梅
擬學冥鴻差強意回看玄髮又徘徊
浮名世上長蓬心我自商歌獨抱琴
流水非因鍾子調陽春只合郢人吟
乾坤大抵分王霸治亂由來半古今
轉悔十年塵事拙不如經濟在山林

贈徐闇公年丈三首

王謝風流誰更傳雄文廿載國門懸
胡床高據談經日漢室初徵射策年
每擬珊瑚為架筆雅聞纓組並當筵
豈知把臂蓬壺外江左衣冠傲昔賢

竹箭東南橫得名飛來龍劍却爭鳴誰云四海同科第自是中
原一社盟懸榻君應稱快事乘槎我亦嘆勞生他年若遂尊鱸
興擬共山陰道上行
吾道滄洲任所遭豈因標榜益名高重逢尚握蘇卿節久別誰
彈鍾子操明月開尊皆勝侶春風入座似醅醪偉長未便從軍
老已羨文章晚更豪

舟次清明

春光客路轉飄零擬踏平蕪探小青自覺草生偏入夢可憐花
醉未曾醒松楸雲隔千峯斷楊柳煙迷兩岸暝欲隱尚違慚介
子年年寒食臥江汀

壽安福伯鄧如磐

鵲石文垂早建牙歸來長嘯餌丹砂漫言赤社千秋恨且種青
門五色瓜匣內芙蓉堪捧日杯中薏苡當流霞興朝若復論人
物自是雲臺第一家

四月八日過仙洞訪石田和尚

炎鄉白晝苦難眠也逐孤雲學問禪行到精廬知浴佛坐來古
洞憶飛仙遠公暫向名山住管子初從遼海還不是宰官能說
法疏泉品石總隨緣

弔熊雨殷相公

怒飛夾日勢排空蠻觸云何又伏戎半壁雄才終抱石三台殺

詩本
氣已成虹高名未許容周顛正色絲來忌孔融猶憶錢塘留戰
血至今春草帶殘紅

弔義興侯鄭履公

五陵豪客徹侯封翼折天門第幾重陳勝亡秦先發難劉琨為
晉竟罹凶稽山甲盾從今散橫野樓船不自容一似鷗夷乘浪
去我來何處弔遺蹤

贈金門蔡元戎

炎風吹客到窮途慷慨逢君意氣孤此日高牙迨大樹多年長
劍枕陰符金城不獨留天險銅柱還應入地圖最羨祭遵饒雅
度時時緩帶一投壺

同陳文生坐雨步韻

經春作客傍龍門春去猶憐蛺蝶魂花醉可曾澆白墮草成還
道勝玄言江河滿地愁偏入湖海頻年病尚存正為陸沈慙石
隱那堪風雨更煩喧

馬爾毓有從軍之嘆戲成二律詒之

一劍南來說曳裾鉞聲早怨出無輿粉曹回憶馮唐節油幕間
誇阮瑀書應悔鶴翎先自剪翻憐雞肋轉成虛烟霞清供難分
寄恐爾蓬心尚未除

北山奈可又移文投筆雄情誰似君掉舌尚能高揖客掀髯誰
許薄參軍嘗秦白璧歸何處問楚黃金費幾斤始信臥龍明出

處草廬先已定三分

將朝王阻颶不果

擬向平臺一問津驚濤無奈拍江濱去留轉覺隨龍子來往何
能逐雁臣似放沅湘猶戀主非關河朔肯迎賓緣知歧路風波
惡決計尋山學隱淪

暑雨同諸子限韻仍禁江窗二字

火雲蒸雨暑難降斜倚繩牀聽石淙愁滿風塵侵鄂被夢回煙
樹繞吳艘蕭條莫恠壺堪碎羞澁應憐劍自雙客路幸逢好友
在且須乘興到春缸

幾年辛苦擁油幢留得完身鼎漫扛風雨似為驅熱至衣冠終
不受魔降沽來濁酒危如斗賦就新詩筆似杠最憶鑑湖晚霽
後采蓮人盡唱吳腔

七夕微雨

碧漢生波蕩素秋良宵又向客中流銀鈎閣處虛穿巧玉璽分
來總織愁天上何嘗須駕鵲人間那得似牽牛故鄉風物空回
首誰買羅暎戲綵樓

值立秋同諸子限韻得鹽咸二字

客擬巢居為避炎曉來秋氣忽窺簾山因寥寂客偏肅水到澄
清意自廉荷蓋初低看墮粉萼絲乍憶下晶鹽滄江物色撩人
甚刷羽丹青莫久淹

臥病朝來謝酒盃迎秋偏愛試單衫樓中豈獨愁王粲林下何
曾醉阮咸清露微微沾薜荔涼風淡淡拂松杉故鄉消息渾無
據滿望鴻來寄一函

新秋鼓浪嶼納涼分得簪字

孤嶼蒼涼沁客心偏宜散髮坐長林山川戰後形容老草木秋
來情性深影亂鞦韆知墮葉聲飄絡緯似鳴琴披襟已在芳洲
上塵俗何能解盃簪

飲吳山人

柴門巷口碩人寬盡日相尋河朔懽說劍不妨頻脫轄懸壺何
必學投竿主賢高擁烏皮几客醉同彈紫籜冠佳興邇來真半

減為君一笑譜幽蘭

贈盧牧舟大司馬

自昔公為兵使者於時我作上書人鑑湖一曲皆棠樹碧海重
逢並葛巾劔氣重當開日月履聲早已傍星辰并州正有來蘇
望忍說桃源可避秦

追往八首

棄繻猶及到燕關慘淡風雲十載還狼鬣自從當日舞龍髯能
得幾人攀漢陵弓劔存亡後晉室衣冠興廢間轉眼書生成故
老慚無媧石補江山

六朝遺蹟雨花臺舊識先皇草昧開南渡尚留龍種在東遷祇

避犬我來却悲羯鼓荒原動不見羊車複道迴國破何人猶抱
膝當年應有管蕭才

長驅胡騎幾曾經草木江南半帶腥肝腦總應塗舊闕鬚眉誰
復歎新亭椎飛博浪沙皆起弩注錢塘潮亦停回首河山空血
戰只留風雨響青萍

王業分明記昔年乾坤日月尚雙懸虹蜺初亘牽牛際雨露遙
承附鳳偏握節可曾干斗象持籤時亦傍爐烟由來國脈難調
久自省原慚祖逖鞭

浮生踪跡嘆勞辛倒挽天河又幾春細柳屯中稱漢使扶桑洲
上避秦人曾嘗虎口身仍在為歷羊腸性已馴窺鏡每憐形影

瘦誰從百折飽風塵

幾投珥筆幾瑀戈屈指滄桑意若何金狄豈愁王氣盡銅雀誰
說死聲多五千甲盾收餘燼百二山川挽逝波天夢到今疑未
醒沈吟轉憶采薇歌

曾挂星槎滄海東冠裳涕淚捧重瞳禹餘風物成離黍越絕功
名類轉蓬早歲頻書惟羽檄經年徒讀是檀弓無家况復鵲啼
急腸斷江花爛熳紅

危峰斜日照疎墩往事蒼涼那可論司馬名因方外貴臥龍才
合世間尊一時市道看梁苑千古交情問翟門高據繩床還睥
睨幾回海沸與山奔

春到何關鄉國情無言芳草自分明一經作客流離久幾度逢
人嫵媚生雄劍攜來空顧影祥琴彈罷不成聲聞身總絕浮雲
意特為鬚眉未放行

憶余在滄島與張鮑淵吳巒雉朱聞玄諸先輩從遊一時
情文宛然在目今三君皆以國殉難而余在行間猶偷
視息然蹙蹙靡聘蓋不勝廢興存亡之感矣

年來灑淚看桑田陶謝風流已盡捐伊昔幾人陪後來我今何
處競先鞭未消肝膽堪誰託無恙鬚眉祇自憐轉覺諸公真羽
化夜臺杖履亦珊珊

舟次琅琦謁錢希聲相公殯宮

琅江東去水如油拜墓停橈古渡頭赤手曾扶板蕩運黃腸猶
帶黍離愁波濤腥壑蛟龍蛻風雨荒塋麋鹿遊懸擬轆車歸北
日同天應已靖旃裘

勾餘霸氣已成灰轉憶當年漢幟開王謝聲名原伯仲溫劉事
業總追陪自從化劍分豐獄誰復調琴到夜臺戎馬南方猶未
息故人空負炙雞來

重經南日弔沈彤菴相國

木落天空肅氣森重來海岸悵人琴從秦狐偃空投壁去越鷓
夷枉范金渭曲璜隨雙鯉逝延津劍化一龍吟只今桑下誰相

語獨倚孤篷淚不禁
木末北還入浙偶成
南浮北泛幾經春
死別生還總此身
湖海尚容奔鬲客
山川應識報韓人
國從去後占興廢
家近歸時問假真
一寸丹心三尺劍
更無餘物答君親

送姚興公北還二首

客中送客復何言
門外驪歌酒一尊
芒屨故應尋帝子
藜床豈必戀公孫
只愁白社高風散
况看滄洲落日昏
吳越交遊如見問
鷄聲竟夜舞劉琨

三山幾度費逢迎
今日重辭萬里行
短髮雖凋猶晉士
長裾不

曳似侯生蒼茫挂席供
圖畫羞溢空囊
賸墨兵此去莫愁無
遇合姚崇原有林時名

壽忠靖侯陳燦珠兼統師北伐

曲逆勳名蓋代才
却從祖帳獻霞杯
威弧自昔懸仙嶠
寶劍新經挂將臺
桃實偏隨榴火豔
星精正向陣雲開
歸來燕喜歌饒日
席上還應張仲陪

送徐閣公監軍北征

魚檄朝來幕府傳
夕攜龍節上樓舡
元卿未許先開徑
士雅還期共著鞭
始識山中留宰相
非關海外覓神仙
但看露布橫飛處
不是涼州倚柱年

幾年獨立金華省此日重登青翰舟準擬真人開北極豈容高
士臥南州錦帆直指天聲壯羽扇輕揮王氣浮匏繫如余甘瓠
落秋風倘許脫鷹鞵

送謝仲彝元戎

疊鼓鳴笳出欽飛將軍此日挂征衣千屯夜火攬槍耀萬壑朝
陽組練威共喜龍驤臨溟渤已知鶴唳動淮淝捷書好向潛夫
寄擬趁輕帆便北歸

壽閩安侯周九苞

倚天秋鏑老芙蓉鼎內神丹碧色同露滄洲饒爽氣烟飛赤
壁想雄風大椿不獨傳蒙叟細柳還應拜上公此日轅門羣獻

壽鏡歌取次奏平戎

登湄洲謁天妃宮

蒼茫一曲帶煙霞聞說飛仙此駐家石髓沁香流乳酪雲根滌
霧想鉛華樓前縹渺凌波襪檻外參差貫月槎湘女雒妃多往
蹟曾無精爽徧天涯

癸巳元日步友人韻

靈槎容易度流年海角春雲思黯然地近虹津堪浴日潮生蜃
市欲黏天東來已識陽當震北望誰云歲在燕先甲後庚應有
象抽毫預擬中興篇

人日立春客湄島

勞生了解宜春梅笑重驚物候新俗入秦餘疑近古時從夏
正識生寅土風薄似村醪惡海錯鮮兼寒具陳野色年年依舊
發王孫何許一沾巾
海外行藏不記春起看天地亦維新鼓鞀往歲聞呼癸斗柄今
年說指寅讀禮每思箋大戴授書尚擬續君陳東風似為羈人
至煖氣偏吹白氈巾

郭聖竑過訪出詩見示依韻酬之

誰云仲蔚長蒿萊白板雙扉隨意開掃石我饒籠翠輿磨嵐君
擅草玄才杖頭時挂千峯月篋裏爭鳴萬壑雷自是主人能慰
客頓忘鴻雁已南回

吳見雪忽憶車駕南巡

往歲南中不見雪今年吳地雪偏濃繁華轉逐冰心冷瑞色還
疑鎖甲同湖海看來元復旦江山戰後漸成翁穆王此際猶巡
狩黃竹歌辭總漫工

入吳

萬里寒江一棹過連天野燒奈愁何風雲矯首憐毛羽霜雪攢
眉羨薜蘿閩嶠駁歸骨自好滇池龍起瘴猶多年來出處渾無
據見說蒼生倍轍軻

寄紀石青年文

歸帆一挂鷺江濤紫氣南迴望轉高關塞羽書偏間隔乾坤蓬

鬢正蕭騷山中到處巢玄鶴海外何人釣六鼈極目寒雲空在
抱不知鴻雁為誰勞

蘇東坡

壬辰除夕寓涪州禪院

浪跡天涯又歲寒強將枯影對辛盤鄉思暗逐鯨波寫世事明
隨漁火看栢葉尊前催律呂蓮花樓上換支干江山百戰渾非
舊留得磻溪把釣竿

蘇東坡

癸巳除夕

八載他鄉蜡鼓催鄉心撩亂鼓聲哀無情天地猶擐甲有意山
川獨畫灰兒女藏鈎離別後君臣投壓播遷來年華如許人將
老辜負春風又幾回

壽英義伯阮季友

甲午

蟠桃塢上小陽春飲至筵開介壽頻共識天台先度阮還知靈
嶽又生申主恩玄髮承三錫將畧丹心動八閩笑我尚為籠鶴
客相期何日捧龍鱗

樓船燈火

澄江春色夜還明雲漢微茫星斗橫銀蒜萬條垂甲帳火珠千
結挂霓旌燭龍勅水張鬢出彩鷁凝烟啣尾行何處香塵空雜
還却教燈市滿蓬瀛

蘇東坡

立春日大雨雪時駐師吳淞

春信驚催玄牕殘江梅猶帶六花蟠屠蘇飲出冰餘冷組練花

浮木未寒吹垢豈期風入夢洗兵自合雨成溥征人感荷東皇
意且逐年光奮羽翰

贈傅惕菴

多君姓氏動芳郵一揖高踪豈暗投經濟東山殊未起文章北
海迥無儔風塵握手沾衣袂霄漢論心晚壁鈎更向尊前問鄉
土幾時扶醉六橋頭

孤劍蒼茫十載餘扁舟東過重躊躇黃金客散韓何在白壁人
歸趙自如大澤魚龍聊混迹中原豺虎正端居莫嫌介子勳名
晚麟閣而今席尚虛

和定西侯張侯服留題金山原韻六首

漢壇左鉞授宗臣飛翰傳來消息真壁壘象橫開北極餘鯨流
斷接南閩雙懸日月旄幢耀百戰河山帶礪新從此天聲揚絕
漠還應吳會是臨津

朝宗百谷識君臣江漢依然拱赤真烽靖三湘先得蜀瘴消五
嶺復通閩水犀飛渡扶桑遠燧象橫驅貴竹新指顧樓蘭堪立
馬肯令胡騎飲江津

鐘阜銅駝泣從臣孝陵弓劍自藏真猶聞雄雉能興漢豈似乾
魚僅祭閩天入金焦鎖鑰舊地過豐鎬鼓鐘新何人獨受專征
詔賜履由來首渭津

自古匈奴屬外臣降王毳殿敢稱真千屯烽燧聯吳楚萬舳波

瀟下浙閩北固雲移龍節近西陵潮湧虎符新
楚庭絕漠尋常事銅柱先標若木津

白草黃沙笑雁臣衣裳鱗介已非真豈知捧翟猶賓粵未必分
茅可擅閩南國羽書氛欲淨西京露布墨應新上游誰擁龍驤
節日轂親扶出漢津

飛椎十載誤逋臣蹠血憑誰破女真霸就鴟夷原去越兵聯牛
女正當閩投鞭不覺江流隘傳檄兼聞鏡吹新正為君恩留一
劍莫教龍氣度延津

和于湛之海上原韻六首

黃埃胡騎獵桑乾長狄笳聲九塞寒金雁俄從別殿識銅駝幾

向故宮看星槎飄泊留旄節雲樹依棲拂羽翰不是孤臣甘浪
跡曾將獨繭著魚竿

貪狼夜指絮雲高鷓鴣痕腥淬寶刀鼈極人傳曾補石龍荒天
限莫投醪翠華迢遞干星漢青翰浮沈捲雪濤澤國自來冠帶
好鬚眉誰不共仙舸

海門潮咽越王城伯業蕭條風雨驚獨少囊金堪結客猶留袖
鐵足塵兵馴來龍性崢嶸在狎罷鷗心汗漫行若論兩河豪傑
有登壇豈必讓齊盟

風流江左半凋殘孤鶴橫空轉自歎瀚海不妨逃漢尉神山未
必誤秦官瑀戈北向慚推轂銅柱東遊憶據鞍留得完身真百

折河清人壽古來難
芥舟天地竟馬如賦就三閭未卜居淚比鮫人長泣蚌官輕狗
監擬焚魚繡弧空指燕然石雕管將成越絕書忽聽陔吟清夜
發旅魂長繞墓門廬
長因編帶重論交把視吳鉤未忍拋慘淡中原誰牧馬蒼茫絕
壑尚潛蛟才名似爾依劉表詩律何人壓孟郊青眼尊前倍感
慨春風旅燕且南巢

哀閩

聞說西陲還帶甲愁看南紀尚橫戈朱門久已辭翁仲黃屋胡
然擅尉佗空際蜂衙誰北里隙中蟻陣總南柯試將班管論王

命漢鼎於今火德多

壽劉復陽誠意伯

燕喜初成介壽詩捧觴細論國恩時候封雨露留年表祖武風
雲蔚帝師舊佩金魚分陝出新橫鐵馬謁陵遲元臣自古多難
老帶礪行者疊紫泥

師次圖山

長江如練繞南垂古樹平沙天塹奇六代山川愁鎖鑰十年父
老見旌旗陣寒虎落黃雲淨帆影虹梁赤日移夾岸壺漿相笑
語將毋後後怨王師

企定西侯登金山以上游師未至遂左次崇明

割雲半壁倚中流天劈東南形勝收鉄甕潮涵飛鷺嶺牙檣影
撼浴龍洲畫江何代空鼉鼓橫海今來駐虎旂尺鍾陵王氣
在可能瞻掃問松楸
相聞赤袂啟重離一詔敷天並誓師萬里鯨波趨錦纜兩山鼇
柱擁金羈已呼蒼兕臨流早未審玄驂下瀨遲瓜步月明刁斗
寂行人猶指漢威儀

再入長江

江聲萬古似聞聲天險依然度水犀涿鹿亦曾經再戰盧龍要
復待三犁瑀弓挽處驅玄武鐵鎖甲甲擐來失白題兵氣只今
猶未洗自慚無計慰雲霓

即事東定西侯二首

誰提玄鉞向燕雲姓氏江南草木間已指黃龍揮戰士何勞青
雀擁回軍兩河父老猶揮涕六詔乾坤正策勳縱有魚符嵩亦
得只今豈少信陵君

十載冰霜誓枕戈豈因歧路轉風波和戎魏絳終當謬結客燕
丹恐亦說剖竹已非秦郡縣分茅可是漢山河孤臣獨有干將
在紫氣青雲自不磨

師次燕子磯

橫江樓櫓自雄飛霜杖雲麾盡國夾威夾岸火輪排疊陣中流
鐵鎖關重圍戰餘落日鮫人窟春到長風燕子磯指點興亡倍

感慨當年此地是王畿

崇沙宋子猶端士也為閩帥所窘既出阮詩以慰之

兵聲誰遣向江濱狼籍樵漁及隱淪可是風塵迷物色到來天地失陽春鑿坏亂後無全計飄瓦傷餘亦愴神轉覺桃源非世外漁郎猶是覓秦人

馬爾毓職方改署幕府騎兵參軍未免牢落戲贈

國破蘭香已半消侯門誰復贈虔刀可憐宦拙同牛阜正覺官閒似馬曹落金應易散陸沈囊粟恐難叨相攜賴有紅顏在枚叟叔遊梁興尚豪

暑雨舟中遣悶分得柴字

乙未

扁舟蒸暑悶難排况復霖霖氣欲埋豈意薰風能解愠乍來好雨足開懷炎雲向晚多於岫病骨兼愁漸似柴忽憶采蓮湖上去荷香十里趁芒鞋

步韻贈別朱子成

如烟芳草色還飛有客乘楂欲賦歸拂袖曾經罷醴未鳴橈倘為弄濤非蒼茫越劍龍文暗慘澹燕臺駿價稀若到會稽應大笑朱君那得老鳧磯

病中遣懷

潘鬢蕭疎已自驚何當二豎復縱橫漸安藥竈同丹鼎早廢詩瓢共酒鎗俠骨風中添翫麟雄心雲外失崢嶸明朝把鏡還相

看華髮星星又幾莖

步韻答沈東生

木落江臯闔闔風翩然天鯉下婁東已知種菊惟陶令誰復圍
棋似謝公三泖霜深丹葉老雙鋒星散紫霓同書郵却問逃虛
客詩律何如在刻中

朝議以諸勳鎮積苦行間宣勅慰勞余蓋不勝踈逖之感
焉

中朝新復下追鋒為問神州息戰烽漢將自驕黃石法胡人倘
畏紫泥封但留大義垂千古敢望虛名到九重稍待鑿迴掃
境後五湖煙雨儘從容

清明感懷

江天小雨恰清明杜宇聲中故國情傳蠟祇成前代事藏煙何
意異時名蓬蒿三徑荒應廢松柏千年暗自驚狸首只今傷暴
露一杯空擬酌佳城

自嘲

年華一擲三十餘對鏡鬚眉復何如鄧禹殊有封侯骨虞卿空
留解相書不貪雞肋猶爾爾徒羨驥尾亦區區若待功成始歸
去溪山主人笑我愚

答紀石青年丈二首

秋雲一片自蒼涼千里鴻心對夕陽蘭蕙年來宛似雪蒹葭露

下正為霜驚開尺素干戈淚賦得聯珠襟袖香解道安危關出處可能無意掃天狼

十年身事半江湖浮拍真同五石瓠多難交游渾陌路主尊警蹕尚泥塗已知世態供談虎豈為微名重憶鱸蚤晚封題通動定報余旌旆指勾吳

王師北發草檄有感二首

似聞天地悔瘡痍片羽居然十萬師走檄故嫌阮瑤拙射書正覺魯連遲九中但說明三表麾下甯忘試六奇要識遺民垂涕處當年司隸有威儀

期門取次出貔貅首路軍聲胡騎愁何獨止戈非廟算還應聚

米是邊籌赫蠻事往疑虛語論蜀才窮愧老謀自古殊勳歸躍馬幾人談笑得封侯

七夕同諸子限韻

淡淡明河帶露痕驚秋長自問天孫斗間槎到應非誤壁上核騰且莫論興至正須浮玉斝愁多何必弄銀盆年年此夜傷離別獨有西風識故園

寄懷徐闇公年丈

洛下仙舟不可尋長因秋水憶橫襟雲翔閩嶠誰高枕楓冷吳江獨抱琴歧路行藏空扼腕亂流聞見倍關心萼絲千里猶無恙那得君來共醉吟

一紀 丙申

一紀戎衣有寸塵到來江漢只孤臣龍編未達劉琨表蛟島空
存豫讓身甌墮妻孥甯復惜劍懸朋友更誰親頻年慙負蒼生
望敢向桃源別問津

扶風

長為扶風惜羽翰年來八翼夢中看呼牛翻覺人情媚歌鳳深
疑物論寬末路勳名難自料他鄉親故強為懽祇應一曲高荆
筑唱徹蕭蕭易水寒

即事有感

久矣浮萍寄此身倦遊何意轉風塵即看蓬鬢難逢世况到灰

心懶應人一旅尚堪扶共主百年誰肯鑿孤臣也拚海岸投簪
去自有桐江足釣緡

馬爾毓不應幕府辟召

爾毓向受知於熊相國張定西

何勞帷帳借前籌司馬於今已倦遊但傲自知無媚骨得閒還
許且科頭雙扉斜日眠黃犢一榜兼雲伴白鷗只恐存亡猶有
恨莫教沈醉過西州

夢中得句云集候秋蟲偏解語失途老驥亦長鳴意似有
感起而成之

一枕新涼夢自清詩魔偏向睡魔生從來物態蜉蝣似未必人
情蝴蝶輕集候秋蟲偏解語失途老驥亦長鳴世間何限榮枯

言
跡底事通人劇眼明

舟次三山

每擁旄幢欲淚潛萍踪無奈又三山才非命世空沈族事尚因人亦強顏猿鶴秋深悲別岫魚龍夜舞泣間關途窮未就行藏計華髮朝來已半斑

壺江即次

倦飛無路且投閒滄海人來第幾灣真覺壺中留日月猶疑畫裏對江山飄流蛋戶還相笑偃蹇柴門長自關閩越波濤千里濶那能有夢寄刀環

壺天乍可一枝安畏壘危機轉自歎駭浪扁舟輕似葉重圍匹馬跳如丸創深已信傷今數痛定應愁捲土難但使胡塵終隔斷餘生猶足老衣冠

重登養港天妃宮

羣山依舊枕滄洲風雨蕭然雜暮愁梅蕊經寒香更遠松枝帶燒節還留荒祠古瓦興亡殿絕壁迴潮曲折流身世已驚飄泊甚如何海外有浮鷗

哭定西侯墓

牙琴碎後不勝愁絮酒新澆土一坏冢上麒麟那入畫汀前鴻雁已分傳知君遺恨猶矐目似我孤踪敢掉頭來歲東風寒食節可能重到剪青楸

重到羊山憶舊與定西侯維舟於此

海國天空一柱撐重過畫鷁似逢迎
雙牙舊憶聯翩駐八翼新看跳盪
行化去鸞旂難入望分來龍劍尚孤
鳴羊山亦有羊公淚片石應同峴首
名

中秋同賓從小飲步朱夏夫韻

海若秋高賦壯遊開尊此夜景全收
坐來爽氣原蕭散醉後清光可拍浮
拾桂不妨同著屐傳柑何惜且擎甌
年來戎馬真塵夢坐嘯輸君已一籌

其二

盤空鵬鄂鷲恣天遊極目雲霄淚未
收幕下風流名自擅樓中

月滿與誰浮行厨玉糝無兼味促席
金莖更一甌佳客莫須嫌草具欲從
樽俎問前籌

丙申除夕

亂後年光似客郵每逢蜡日越生愁
傷心繞樹猶三匝屈指浮楂已一周
國事存亡關正閨人情冷暖逐春秋
啣盃却問東皇信應為催花出嶺頭

丁酉元旦余駐師秦川

閩國旌旗越國船春風後倖到江天
未能捧日真虛歲且復占雲似往年
辛苦椒盤一紀後衰涼菱鏡二毛先
夜來見說旄頭闇拂拭吳鉤競祖鞭

送陳立之還閩

鷺江一別榻空懸
涵水潮來意惘然
君較虎頭原獨步
我甘龍尾尚高眠
天聲到處憑揮羽
國恥談間欲置鉛
若問歸帆何所載
祇應圖得越山川

舟山感舊

戊戌

孤雲兩角委漁磯
極目滄桑事已非
隔浦青燐相掎映
傍溪紅雨自霏微
檣烏轉逐危身宿
社燕空尋舊壘飛
獨有采芝人尚在
天荒地老不知歸

十洲三島憶登攀
煙火仙源半闌闌
豈意晉陽仍禍水
枉傳越絕有神山
荒城睥睨眠還立
虛殿呆愚廢莫關
誰與海翁爭地

王到來却讓白鷗閒

江臯烽盡燼猶紅
獵火巋然滿故宮
樓閣總隨蜃氣散
鼓鼙迸入角聲空
田橫島上淒涼月
杜若洲前零落風
翹首靈光何處是
五雲應復捧南中

島嶼微茫兵甲殘
千年碧血恨漫漫
空邨人跡疑毛女
野寺僧閒說漢官
獨喜亡秦三戶在
翻憐興夏一成難
只今漲海胡塵裏
莫作當時天塹看

五月既望行營恭祝監國 魯王千秋有感

寥落吹臺望紫宸
上觴此日正千春
乾坤縹渺靈光殿
江漢滌洞黯黹津
一自玉輿蒙霧露
遂令金鑑轉風塵
可憐節下遙稱

祝獨有瑤池舊從臣

冬懷八首

故國玄陰迤未開蕭條景物總堪哀龍蛇蟄後天方屈草木凋
殘地亦災禿節誰留蘇武窖名流幾上李陵臺賓鴻獨解朝宗
義依舊隨陽度海來

九邊鎖鑰斷胡烽醪續先朝費歲供猾夏已無秦塞險防秋豈
復漢家封黃河凍解應回馬碧海波揚欲起龍寄語金微多舊
戍草枯蓬折為誰從

鍾山紫氣隔黃塵石馬金鳧倍悵神縮酒不聞供楚子藏冰空
憶與凌人雲寒輦道橫氈帳火炤臺城臥鉄輪賸有孤臣依漢

臆海天何處答明禋

滇池洱海拱行畿玉輅遙巡正式微意苾林間屯組練枕椰花
底度旌旂中朝夢遠難歸節大澤寒深少賜衣矯首嶺頭春信
好南枝爭似北枝稀

清角悲笳思黯然長因滄海問桑田越王臺榭風煙暗禹會冠
裳日月鮮黃屋建時曾割據朱弓受罷亦依遷只今冷落蛟螭
窟雪夜徒吟兔苑篇

樓船戈甲自羣雄指顧扶桑可挂弓豈意空填精衛水頻年猶
御石尤風田橫避去偏多客徐市歸來恐似翁見說斗杓回北
陸敢將消息問蒼穹

何須南國更招魂
甌脫江山幾處存
豫讓有身還未漆
要離無族已先燔
最憐燕子來孤島
獨負梅花到故園
縱使鬚眉仍健在
炎風朔雪不堪言

朝暾慘淡夕飈寒
痛飲豪吟且自寬
萬里孤槎真汗漫
十年長劍總蹒跚
先鞭未許終輸祖
前箸何妨借報韓
安得三塗還帶礪
却令百粵盡衣冠

戊戌元旦

扶曦初拂上枝寒
曙海春回歲月寬
塞柳江梅看次第
朱旗玄鉞映闌干
獨驚馬齒垂垂長
都把魚腸細細看
要識嵩呼南極近
而安天末是長安

聞行在所遣使至營宣諭有感

傳聞使節下牂牁
天語啣來識聖波
南國衣冠猶似昔
北門鎖鑰竟如何
時危還說依銅馬
道阻徒勞想玉珂
料得

楓宸能燭遠黃麻
紫綉不須多

頻年東國賦無衣
百粵依然守六飛
彤管幾曾參講幄
玄戈空

復仗戎幃時余官少司馬兼學士
徵師已審皇情重
掃境猶慙臣力微
從

此羣材須努力
星軺到處即天威

徐閣公入覲行在取道安南聞而壯之

益部星文紫氣躔
遙知雙鳥去朝天
孤臣白髮還投闕
真主黃衣尚備邊
五嶺新衝春瘴癘
九溪舊闕古山川
旌旗只在昆明

裏好說中原望凱旋
萬里行朝古夜郎從龍敢復憚梯航使車合浦愁風黑賈舶交
州怯日黃白馬侯王今異姓青牛令尹久炎荒多君不負溫劉
約玉佩先歸銅柱旁

得家信有感

漫向空閨問別離年來翟弟已難期失林猶惜飛蓬早出獄仍
悲曳編遲豈為留賓還斷髮聊因佞佛故低眉天涯亦有刀頭
夢恰是蓬山化石時

浪跡何如五岳遊向平累在轉生愁佳兒天幸猶完卵弱女人
憎似宿瘤敢望童烏能接武祇令老蚌自含羞故園倘有歸來

候最好沙頭趁野鷗

寄金二如兼訊朱建武

越絕衣冠已入胡年來故老盡瞻烏吹簫江上虹誰變棲甲山
中月自孤似我鬚眉還戴漢多君姓氏欲逃吳羣豪獨有朱家
在猶向西京結客無

贈客還里門

鑑湖揮手十年餘里社誰尋舊草廬今日相逢皆後乘高風斷
不為長裾臯比暫向龍門設塵尾聊從虎帳舒惆悵君歸當雨
雪故園梅信復何如

奇零草卷下

七言律

海上觀燈限十五刪十五咸二韻己亥

島嶼微茫午夜間
魚龍曼衍出塵寰
蘭缸射水翻星漢
蓮幕傳烽破玉山
香擁虹橋千里外
芒寒蜃市九霄間
遙憐歌舞長安地
銀鑰今宵自不關

極目滄波明鏡函
火珠獨見燭龍啣
鮫人夜貢珊瑚樹
雲母春開錦繡帆
金谷未須誇富貴
瑤池應不隔仙凡
自來三五傳柑勝
豈惜霞觴付酒監

聞貴陽失守

百粵河山已自愁播遷此日更堪憂方傳檣杙從南甯豈意櫓
槍自北流險阻莫能關象郡矣荒何處割鴻溝一成賴有滇雲
在捲土誰為借箸謀

會師東甌漫成

甌越江聲動鼓鼙羈圖南北尚羈棲誰為揖客稱司馬獨將遊
兵是水犀箸借自來非為漢瑟操猶恐未工齊十年種蠶成何
事敢向人前說會稽

師次觀音門

樓船十萬石頭城鐘阜依然拱舊京弓劍秋藏雲五色旌旗夜
度月三更中原父老還扶杖絕塞河山自寢兵不信封侯皆上

將前茅獨讓棄孀生

師次蕪湖時余所遣前軍已受降

元戎小隊壓江關面縛長鯨敢逆顏吳楚衣冠左袵後蕭梁城
郭暮笳聞王師未必皆無戰胡馬相傳已不還寄語壺漿休怨
望懸軍端欲慰民艱

師入太平府

天驕取次奉冠裳畿輔長驅鏃衲褱王業昔誰開采石霸圖古
亦起丹陽太平郡即古丹陽郡百年禮樂還豐鎬一路雲霓載酒漿此去
神京原咫尺龍蟠虎踞待重光

姑熟既下和州無為州及高滂溧水溧陽建平廬江舒城

言
合山巢縣諸邑相繼來歸

干將一試已芒寒赤縣神州次第安建業山川吳帝闕皖城戈
甲魏軍壇東萊玉帛空胡虜北望銅符盡漢官猶憶
高皇初定鼎和陽草昧正艱難

驛書至偏師已復池州府

赤羽飛馳露布譁銅陵西去斷悲笳橫流錦纜窺三楚出夾霓
旌接九華歌吹已知來澤國樵蘇莫遣過田家前驅要識王師
意劍躍弓鳴亦漫誇

師入甯國時徽郡來降留都尚未克復

千騎東方出上游天聲今喜到宣州威儀此日驚司隸勲業何
人愧徹侯舊闕烽烟須早靖新都版籍已全收遺民莫道來蘇
好猶恐瘡痍未可瘳

間行雜感

鏡幃纔纔解又芒鞋姓氏逢人且自理夜踏巉巖驚伏虎朝披
霧露避羣豺乾坤蒼莽投金瀨徑路蕭涼阻玉階贏得風衣兼
雨帽相看不似舊形骸

一椎可奈誤秦車蕭瑟秋風圯上書伏匿那能忘鏡馬潛遊猶
覺負銀魚荒村雲擾難敲枕單衲霜深已敝裾總是姓名隨地
變任呼牛馬亦何如

濱海居民聞余生還咸為手額且以壺漿相餉余自慚無

言
似何以得此於輿情也

虛名浪說逐羣雄垂翅何心得楚弓每把金魚羞父老還應竹
馬笑兒童衣冠不改秦時俗雞黍相遺晉代風正覺漁樵多厚
道不將白眼看途窮

春江花月夜值微雨限韻

春光何處不迷離江月江花帶雨時玉暈浮波千萬里檀痕浸
水兩三枝人行濠濮清輝溼天入滄浪翠靄奇若使扁舟乘夜
去暗香疎影更相宜

春雨望茅舍炊烟限六魚韻

江邨烟雨復何如楚外人家雲外居松爨蒼寒春杜曲茅檐清

迥古秦餘水雲半入漁樵宅烟火堪傳風俗書最愛陰晴剛社
日啣泥小燕傍精廬

白燕次友人韻

燕燕何來素質稀寒光曉暝正熹微啣泥自合棲銀蒜掠水分
明曳編衣月滿空梁偏失影雲封舊壘倍生輝羽毛自愛天然
種不傍尋常王謝飛

得徐闇公信以交行詩見寄

天南消息近成虛一卷新詩當尺書誰看墜鳶偏擊檣似聞鳴
犢竟迴車蠻夷總在天威外越嶺應非王會初讀罷瑤篇還涕
淚行吟何獨有三閭

瘴海誰堪汗漫行知君五月在舟程鯨人鼓鬣驚濤暗烏鬼舍
沙宿霧生溫嶠已乖歸闕望張騫徒負泛槎名武陵溪畔桃源
客故節依然蘇子卿

賦得相逢俱是歲寒人

相逢俱是歲寒人遲暮偏驚搖落辰鴻雁接天關塞影漁樵滿
地雪霜身論交四海漸兄弟抗節千秋泣鬼神此日炎趨應不
少道傍裘馬正紛綸

新安溪行

曲曲谿流面面山青峰千折水千灣山亭擁霧遙疑塔水碓舂
雲巧作關越榜下瀨雙槳疾吳鹽到界一帆閒却看兩岸楓林

晚似送離愁炤客顏

寄宿石塘與居人道定西侯往事

漢牘誰留十五年琴亡島嶼尚蒼然野人偏愛甘棠樹義士猶
吟華屋篇海有浮鷗憐後死村無眠犢憶前賢請看緱嶺今宵
月可得將軍勒馬還

索居島上童子折梅來獻喜而有賦限十三元韻

芳信天涯誰過存一枝瞥見慰離魂寄來庾嶺應無驛疑到羅
浮別有邗仙史輕華宜淡墨故人蕭散足清尊巡檐為弄陽春
曲羌笛何須惱故園

絕島凝寒氣未溫忽傳春色到蓬門蒼顏猶帶烟霞韻素魄時

留冰雪痕欲探龍頭愁遠樹却看牆角喜孤根疎枝冷蕊仍堪
把何遜揚州且莫論

湖海椒觴十五星故園咫尺恰揚舲流年與日相將去歸夢兼
愁總未醒蜡鼓何如鼙鼓急聞船猶並越船停春來消息茫無
據起抱菱花仔細聽

立春用杜韻 己亥冬末

臆殘海嶠懸桃日正是山家爆竹時寂寞兩京寒玉瑄蕭疎雙
鬢點絲銀絲干戈回首都成夢杖履隨身那免悲不飲也應春
酒笑強邀石凍助新詩

卜居

荒州小築笑焚餘結構新茅再卜居性僻故貪鷗鷺侶地偏猶
逼虎狼墟寒蘆瑟瑟秋將樂宿火熒熒夜讀書正憶普天方在
帶此身那得混樵漁

庚子元旦駐師林門 庚子

中華正朔古相傳永曆於今十四年玉几南荒新日月
旬金戈北道舊山川春來水逐桃花漲老去人爭栢葉先猶幸
此身仍健在擬隨斗柄獨回天

新正二日坐雨島上

纔望晴雲布歲朝漸來仙嶠雨蕭蕭山烟繚繞蒼堪滴海氣糝

言
糊白欲飄撥悶屠蘇隨意醉滯寒楮袖逐時燒故人天際誰相
問總為春風尚寂寥

贈張書紳還錢塘

歸棹蕭然向虎林論兵十載愴知音千金散盡仍彈鋏四海交
空且碎琴戶牖陰謀天地忌夷門奇計古今深風塵何處躬耕
好垂老還為梁父吟

愁泊

蕭風苦雨逐潮來慘淡危舟倍足哀身比偃僂長似曲心疑混
沌不知開海翁屢蛤還相餉山鬼揶揄且莫猜往事分明堪擊
筑浮生那得數啣杯

上巳書懷

九十春光強半空今朝禊事媚東風亂紅過雨應千點新綠含
烟自一叢曲水無觴娛島上遠山似笏供簾中子規歲歲啼成
血不道勞人太轉蓬

春晚

芳洲春晚徧靡蕪一抹烟光挂綠圖好鳥弄晴聲劇膩野花催
暖氣流蘇中年豪舉還多少來日佳遊定有無可惜豔陽閒謝
却祇應吾道在江湖

重過桃渚

一棹天台依舊迷重來秋爽足攀躋苔衣糝糝鬢偏美石磴鱗

鱗齒未齊夢到赤城霞氣近感深滄海水聲低臨流空作桃花
想愧殺仙源是武溪

復屯林門

十年兵甲滿滄洲此日迴戈又上游人去鹿場仍舊跡秋高蟹
脯足晨羞空山餓犬聲如豹失路窮黎狀似鳩自笑經營何太
拙誤將島嶼作并州

中秋有懷

去年拾桂英山裏今夕浮槎漲海中關塞每憐寒雁影江湖應
悵鯉魚風金甌玉露原無異躍馬乘舟已不同明月當前人在
側持螯把酒莫辭從

歲暮得蔣馭鴻信兼見其新製寄贈二首

蔣舊任御史
今入道

海嶠玄雲入歲除遠從苕水下雙魚少微慘淡愁無賴中散蕭
疎調有餘仙鳥不妨神武外法冠何似惠文初鑑湖珠樹今在
安在黃鶴摩天未可居

梅花一寄起相思聞向江邊學采芝吳市尚留仙尉跡青門何
限故侯悲鴻冥豈為飛揚倦驄瘦還應行步奇獨怪槎來十二
載只傳柱下五千辭

步韻和曹雲霖活島秋懷二首

荒烟殘燒越王臺憶昔雄圖今倍哀丹葉三秋何事老翠華六
詔幾時迴纔從鷺島懷人遠忽得魚書對客開詩律邇來知漸

細高吟低唱且徘徊
天長地濶總傷秋
閩嶠寒雲路更幽
戴漢節旄空自落
強吳薪
膽向誰謀
百年形勝留天塹
一望烽烟達帝溝
堪笑魚龍還寂
寂祇餘陵樹鎖江流

島上祀竈

絕島寒宵亦薦陰
聊從越俗祀非淫
曾聞五祭尊盆盞
却憶西歸賦
釜鬻老婦倘能來
絳節少翁空說致黃金
只憐漢臘無多地
栢葉梅花自古今

辛丑元旦清曆十八年矣

春回島嶼海天波
紫閨其如赤伏何
晉室新書題甲子
周家舊

曆紀共和金沙日
暖朝迴輦玉壘雲
開夜止戈

聞王師出滇
克蜀故云

說今年莽臘盡
椒花頌裏雜鏡歌

送黎大行南訪 行在

誰登仙嶠訪皇輿
十載驚傳典象胥
英蕩誰歸萬里節
輶軒徒積百蠻書
越人翡翠應無恙
漢使葡萄總不如
惆悵五雲橫
焚道看君却上指南車

見友人詠懷詩有感依韻和之

梨花春雨半含秋
太息當年桑下謀
國事幾番真似奕
人情冷到處盡如鈎
金雞雲樹空瞻闕
石馬風榛自滿丘
未必策勳先上賞
綿山一過汗應流

漫從季野定陽秋，羈略誰堪孫仲謀。末路行藏關漢鼎，中朝興廢仗吳鉤。杜鵑影重迷荒徑，謝豹聲多恨故丘。此日河山猶破碎，敢言江左有名流。

春島霧雨次壁間舊韻

輕寒二月恰春陰，蒼霧青嵐若滯淫。客至梅花初滿甕，官貧柏子尚盈鬮。櫻桃紅暈枝枝玉，楊柳黃疎樹樹金。笑語東風何惡薄，獨遲芳信到於今。

雨中寒甚再臺前韻

浮雲何意結層陰，海氣朝來越浸淫。誰解催^花能節鼓，豈逢寒食欲懸鬮。春衣襪還如鏡，島樹槎枒轉似金。可是大荒猶殺運。

難將爽理佐當今

維揚姜張二友浮海來訪賦贈

廣陵春擁雪濤來，萬里江聲亦壯哉。忽訝龍文臨越嶠，何須駿價起燕臺。陰符欲捲滄溟潤，借箸能令瘴癘開。帝室只今還卜獵，飛熊好待後車回。

口廷即事

頻年長狄掃黃圖，此日狼星斂角無。石矢未曾賓肅慎，金人猶自祭休屠。雖然下殿當天象，可復穹廬滿帝都。獨笑中華皆孺孺，幾回膜拜捧胡雛。

春暮悵然有作

蕭條春事又今年
島樹江蘿最可憐
悲至淚因孤燕下
閒來魂在杜鵑前
雄圖誰復能窺足
雌節何如且息肩
記得古人曾化杖
鄧林孤影亦參天

輓董天鑑孝廉

三策天人罷董生
誰憐日馭已西傾
遊從麋角身將隱
識應龍蛇意未平
晉代猶留靖節諡
漢家原重孝廉名
即看墓石封題處
尚有賢書是大明

入洛衣冠江左餘
逋臣肯復待公車
風雲早冷三鱣兆
日月長

懸五馬居

孝廉先人宦州刺史

結客黃金良不易
修文白馬竟何如
茂陵

今日皆禾黍
遺草空留封禪書

得徐閣公書為之喟然

長看北極望南洋
傾日依風總渺茫
愁過魏牟還戀闕
病同莊鳥肯投荒
應憐牛酒遲江左
莫道魚鹽擅海王
倘去三山須問訊
君家大藥在何方

愁心

一水秋明繞萬山
愁心似水轉相關
虬髯定擬浮家去
雁足虛傳屬國還
聲入鼓鼙龍似鬪
夢迴砧杵鶴難攀
平原一旅真孤掌
可有天戈靈武間

寄張書紳時聞在越

雁到寒沙一片秋
聞君猶作下邳遊
江山雄視渾綿叢
湖海輕

言
裝只削緹醉後諫書多逐客愁中詩史盡離憂赤城霞氣今依舊何必衣冠禹穴求

莫指

莫指招搖望泰階小戎同澤已難諧三山波浪盧敖跡半壁烽烟祖逖懷紀事可能無鐵匣班師豈復有金牌皇天倘識匡扶義萬古臣靡獨我儕

南國

雲肥大澤正高秋南國旌旄何處留良會偶逢偏易失好音頻致終恐浮海中似有金銀闕域外曾無麟鳳洲祇識漢家懸異數每將白馬誓王侯

黎大行瀕行以途窮為恨賦詩見示用原韻報之

柳色河橋弄晚陰臨歧攀折思偏淫乍來紫氣原干斗此去皇華為漑鷲殿上未歸和氏璧橐中誰賜陸生金飄零莫飄漫愁書劍六傳平驅正在今

三月十九日有感甲申之變

燕山春老泣啼鵑屈指號今十八年闕里麟遊書莫載橋陵龍逝鼎仍遷玉衣晨舉黃塵染銅狄秋眠碧血捐欲賦黍離何限恨依稀風雨故宮前

當
三年羣盜滿長安倉卒宮車棄百官旗散黃龍爭解甲桁虛朱雀罷鳴鑿攀髯猶惜鬚眉少塵紐空悲羽翼單獨使至尊狗社

稷千秋青史未曾寬

漢家天仗肅仙班一擲金椎不復還
首着祇肥秦塞外櫻桃誰薦
晉陵間魂招蜀望花同碧淚染姚華竹
畫斑何處旌旗皆編素好傳露布到陰山

辛丑除夕行營沙關

十年三度到關關風急星迴客未還
樓臘總來殊越俗屠蘇那得破
愁顏春符競貼黃龍榜新曆虛啣丹鳳班
悵望故山雲物改歸心不斷歲時間

壬寅元旦軍次仍行祝聖禮

蒼輅青旗不可望海隅猶得奉冠裳
吹塵夢逐條風遠思漢情

隨旭日長萬里越人迷貢朔

時滇黔陷已二年

百年真主闕當陽也知

報國心無補願續春王正月章

得故人書至自臺灣

炎洲東望伏波船海燕啣來五色箋
聞有象耘芝朮地愁無雁度菽蘆天
息機可是逋臣意棄杖誰應夸父憐
只恐幼安肥遯老黎牀皂帽亦徒然

杞憂天墮屬誰支九鼎如何繫一絲
鼉柱斷來新氣象蜃樓留得漢威儀
故人尚感蹇蹇裳夢老我難忘伏櫪詩
寄語避秦島上客衣冠黃綺總堪疑

元宵舟次步宿從韻得魚字

春濤擁艦儼宸居雪舞風迴寒滿裾簫鼓浮空停曉箭樓臺幻
景隱仙輿帳中絕少盤龍戲幕下偏能倚馬書共道六鼇來海
上如何炤夜只鯨魚

驚聞 行在之變正值口廷逮余親屬痛念家國何能已
已

自分孤臣九死應國仇家難轉相仍埋名恨不同梅尉誓旅知
非擬駱丞芳草王孫歸莫望蒼梧帝子去無憑枕戈此日將何
待仰視浮雲一拊膺

七言絕句

招趙友飲禪院

清明今朝買百壺擬邀佳客醉屠蘇玉山倒處人爭看可有連
城一壁無

過仙洞訪石田出荔枝為供

丹囊朱纈亂垂垂壁上蓮生總不奇君自瞿曇我自客相逢疑
是嶺南時

七夕前十日贈少年合卷

玉渦檀暈自生妍綠幘青鞵正少年恰似雙星銀漢渡風流恰
占一旬前

舟行阻風口號

十載曾經犯斗槎
天門昨夜特宣麻
乘流只恐排闥闔
故遣長鯨鬪浪花
勅水鞭潮勢自雄
此身原不畏蛟龍
明朝鷁首還東指
禁得誰搏萬里風

晚泊漫成迴文

寒潮晚落半江空
燒帶羣山亂映紅
殘角霜聲愁雁斷
難將送挂一帆風
風帆一挂送將難
斷雁愁聲霜角殘
紅映亂山羣帶燒
空江半落晚潮寒

讀史

秦鹿橫飛六國殘
狐鳴篝火亦登壇
留侯若也歸張楚
更有何人解報韓

清秋蕭瑟井梧寒
在莒齊襄淚未乾
七十二城猶在望
却無舉火是田單

野人餉菊有感

戰罷秋風笑物華
野人偏自獻黃花
已看鍊骨經霜老
莫遣金心帶雨斜

柴桑杯酒寄東籬
種菊書成在義熙
今日風光如昨否
殷勤且自抱花枝

嘗言愛物耐霜威
晚節都甘與世違
只恐秋來容鬢改
幾人插

得滿頭歸

天寒萬木盡悲秋
誰殿羣芳鬪未休
寄語黃花應努力
須知搖落有黃州

經烏江

楚歌聲裏霸圖空
匹馬歸來勢自雄
四百年餘炎火斷
誰知隆準一重瞳

旌旗垓下亦堪翻
戰士其如憶故園
縱向江東收燼去
應無子弟到中原

撥陽謠

百尺風帆百丈牽
撥陽湖裏去如烟
江南米價秋來長
喜殺桐

艚買稻船

沿湖下網蕩湖船
網內纖鱗錦樣鮮
燈火湖邊兒女笑
魚秧種得不須田

黃湓謠

妾家生小住黃湓
亂挽烏雲刻著禪
九月魚腥湖上熟
自搖蘭槳過前村

黃湓賈客百金裝
湓口長年醉索郎
聞說江干烽火急
停橈一曲古襄陽

鹿走勿逐自復戲成

失鹿何曾得鹿期
重來豈獻牡丹枝
隍中蕉葉原非夢
為待仙

人夾輟隨

寄遠

寒燒荒原映夕烽
海槎猶阻石尤風
故園梅信今何似
可有鴻書雲外通

和秦淮難女宋蕙湘旅壁韻

獵火橫江缺騎催
六朝鎖鑰一時開
玉顏空作琵琶怨
誰教明妃出塞來

賦贈東山子端陽禱雨有應

真覺星辰可換移
端陽豈是亢陽期
幽風畫出田家樂
續命何須臂上絲

霹靂車中呪孽龍
炎輪直欲掩豐隆
馬鬃一滴濃雲黑
失却榴花數點紅

繁露春秋說大雩
誰憐五日欲無襦
杯中唯有樂巴酒
灑作千家攝水符

七夕前十日贈人合卷

蘭湯浴罷不勝衣
一曲菱歌百兩歸
自是合歡憐子夜
玉山對倚照羅幃

旅愁

故園花候又辛夷
夢自惺忪涕自洩
雁去燕來相笑語
何年客子是歸期

卜天種畫寢戲成

新秋蕭瑟北窗涼一枕羲皇夢亦長試問漆園蝴蝶影可曾逆
旅聞黃梁

五言律

暑夜獨坐己丑

炎歊如酷吏入夜氣猶蒸晞髮涼初透捫鬚興欲乘風斜穿密
牖月午漏疎簾四壁蟲聲咽誰堪一語冰

絕炊壬辰

炎涼雖世態不信在同舟自去梁間燕真同水上鷗婢原無赤
脚僕已鮮蒼頭亭午炊烟絕何能免百憂

僕還

僕貞良不易旅瑣更為難已任辭鞫去還同戀棧看做惟原有
待墮履未應拚自是無銀鹿猶勝形影單

贈駱亦至

客自涪州至蕭然野鶴姿青雲猶冉冉白雪故離離
混俗原無我廉頑更有誰蒲輪指日下莫漫采江蘿

其二

唐室當中葉君家有右丞雄文堪討賊苦節亦為僧
蹤跡今相似遭逢古未曾會須扶日月滄海見鱸升

登涓州

不盡滄浪興孤洲眺晚暉海翁稱地主野父說天妃
舴艋風前出鑿鋤雨後歸侏僂雖未解一笑亦忘機

送萬美功還越時其弟靜齋將赴行在

令弟將南邁元方又北征炎荒萬里節越絕一歸旌
欲聚非麋鹿難分是鶴鷁祇應山鬼語但見送人行

鬢有絲 甲午

曉起窺雙鬢衰容變二毛鬚眉長自矧筋骨總徒勞
物態離情換年華苦節銷自憐蒲柳質秋意早蕭騷

追慕

國難驅人出家傾待子歸可能磨墨盾其奈冷班衣
金革三年淚冰霜寸草暉髮膚雖不毀猶恨故園非
廿載嗟何怙長街栝棧愁節旄看盡落斧鬣悔遲謀
燕去巢應改烏呼屋僅留在堂有委蛻無計翦青楸

言
得友人書道內子艱難狀

尺牘胡然至寒温不自通殷勤報聞外辛苦數閨中錨釜原兼
絕機梭亦屢空鹿車誰共挽羞殺是梁鴻

家計深行惻朱顏亦固窮漸來應化石遮莫但飛蓬寄託誠交
道支持仗女工可憐織箔手未得到從戎

客有談故園花事者感而有賦

乙未

故國春應滿花枝解炤人馱笙還出郭燒筍或呼鄰此事真無
價吾行未有津繁華豈不愛天步屬艱辛

秋懷三首

秋色來何許滄江對晚潮宜人偏淡蕩對我總蕭條隼翮憑誰

健狼心尚爾驕也知雲意薄聊自擬丹青

屈指金行半流光不我予鱸膾味信美雁足耗全疎客散黃金
盡兵飢白粲虛只愁綿力弱何以挽皇輿

天方尊肅氣人已苦兵聲高枕真無事扁舟似有情靜同仁者
壽隘得聖人清遣放應如此毋勞造物爭

大安沙坐風雨復臺前韻三首

風雨添新漲荒洲幾尺潮場禾愁滯穗渚荻響叢條茅舍炊烟
淡篷窗暝色驕秋飈毋乃妬未敢說摩霄

不解因人熱新涼忽起予單衫輕自好雙鬢落應疎冷煖秋中
節升沈覺後虛九州多怪事無賴問堪輿

尋常悲旅况可復雜秋聲砧杵千家夢萼蕊八月情寒蟬啼露
重健鶻喜霜清始識乘除理玄心了不爭

弔旅墓 丁酉

荒墳三尺土宿草幾經秋鬼亦離鄉賤人胡渡海遊鹿場殘照
淡蟻垤野花幽不用山陽笛淒然淚自流

得姚興公書以舫音集見寄 法號耀公 己亥

何處纖鱗至瓊雲落滿函虎溪聞卓錫鷺島憶歸帆詩律隨人
老禪鋒已不凡慚予塵夢在兀兀趁征衫
叔世嗟無具為僧亦自嘉只愁新舊雨總作暮朝霞楓落江烟
澹梅橫漢月斜何時雙鳥下相對飯胡麻

生還四首

落魄鬚眉在招魂部曲稀生還非衆望死戰有誰歸蹈險身謀
拙包羞心事違江東父老見一一問重圍

痛定悲疇昔江臯滿陣雲飛熊先失律騎虎竟孤軍鹵莽焚舟
計虺隤汗馬勲至今頻扼腕野哭不堪聞

本以揚旌去胡為棄甲旋名城空繡錯故老盡株連百折終何
補千秋倘復憐亦知收燼易蕭索愧金錢

奔北誰能殿圖南我亦迷翻令百步笑未得一枝棲孤島搖烽
燧登壇恃鼓鼙風雲蹉跌後無計展霜蹄

島居八首

天地勞何甚空山足息機
玄黃悲鼎沸蒼莽看帆飛
誤世芙蓉劍撩人薜荔衣
迷途知未遠還復卧鳧磯

島事幾滄桑何勞更辨亡
人能扶日穀我且挾雲囊
傲骨甘鷗鷺雄心怯虎狼
誅茅還闢土海外有封疆

古賢多大隱豈必盡攀龍
所惜辜三輔其如礙兩雄
計疎憑鑄錯道廢漫書空
仰止羊裘客千秋一冥鴻

山中仍逐鹿却喜少雄雌
蛋戶供新錯屨樓獻秘嬉
鑿坏聊偃蹇拜石故支離
試問門前雀何如翟尉時

閭闔不可極投荒小有天
行藏疑菊叟變化愧梅仙
野火漁燈外樵風雁字前
到來生百感嘆息理詩篇

浮槎非我好戀戀為衣冠
豫讓橋應近田橫島正寬
蘆中長磬折圯上獨盤桓
雖未成嘉道人呼管幼安

十洲曾卜築師過毀為薪
荆棘任公宅蓬蒿夸父津
老麋避客去舊犬逐人親
不忍乖初服茅簷又日新

鳩工嚴部勒治屋亦猶兵
據水軒轅法依山壁壘橫
短垣繚却月中雷貫長庚
只此扶桑國居然細柳營

送邱舍三還長亭山房

邱舊任中書舍人

投老猶垂橐忘歸未拂衣
江山雙淚迸家國寸心違
作客悲王粲為郎憶紫薇
入林還悵望吾道已全非

浮踪同邱舍三感賦

蕭瑟干戈事浮踪已似萍半床留破席一室欠疎檣霜月窺人
白漁燈入夜青天涯知己在猶自嘆零丁

寒山

寒山一息影歧路總忘機敢望充藜藿其如斷蕨薇徘徊貪有
髮惆悵賦無衣此地兼烽火孤踪何所依

庖焚

已自傷餘燼何堪厨傳災早應防厝火空復冀燃灰鼎俎渾輕
擲盤盂且盡墮明朝添菜色那得爨烟開

得朱子成書

庚子

書來惜分手正憶皖城秋入海仍精衛還山尚蒯緱參差非恨

事倉卒少良謀異日傳心史孤忠冀見收

聞監國魯王以盜警奔金門所

揮淚東南信初聞羣盜狂扁舟哀望帝匹馬類康王流瓠終何
限依斟倘不妨只今謀稅駕大地已滄桑

秋夜舟中聽雨

不盡蕭蕭意還從入夜生草枯沙磧氣木落洞庭聲欹枕聞疎
密敲篷辨濁清渾疑北斗靜缺騎暗縱橫

新河口雨泊二首

一水真衣帶今行報幾籤迴颿何震盪飛沫更廉纖啣岸潮聲
壯膠舟風勢巖叢祠堪蔽雨分旅向山尖

四時冬不用况乃問舟程自與泪人伍翻令颺母輕枯槎粘水
骨虛枕挂魚睛珍重陽侯意毋勞費送迎

送吳佩遠職方南訪 行在兼會師鄖陽四首 辛丑

何處申胥哭星槎滄海回依牆悲鶴立戀闕夢鑿迴黑纓黃圖
闢烏蠻紫氣來孤臣芒屨好敢望畫雲臺

哀郎原有國聞自夜郎移輦路應千折旌臺亦九疑駿歸何日
事翟捧幾人知君去排闥闔將母恨執羈

鄖江稱斗絕咫尺向夔門雲棧凌霄起霓旌插壁屯金貂皆上
將鍍馬足中原一見隋何檄還應報國恩

尚有臣靡在其如天步何涼州方倚柱盟府孰揮戈刁斗孤軍

細香盆夾道多憑君馳蠟表早晚聽鏡歌

感事四首

箕子明夷後還從檄外居端然殊宋恪終莫挽殷墟青海浮天
濶黃山裂地虛豈應千載下摹擬到扶餘

聞說扶桑國依稀弱水東人皆傳燕語地亦闢蠶叢筆路曾無
異桃源恐不同鯨波萬里外倘是大王風

田橫嘗避漢徐福亦逃秦試問三千女何如五百人槎歸應有
恨劍在豈無嗔慚愧荆蠻長空文採藥身

古曾稱白狄今乃紀紅夷蠻觸誰相關雌雄未可知鳩居粗得
計屢市轉生疑獨惜炎洲路春來斷子規

秋日傳蜀郡克復瓊海反正喜而有賦

商聲八月愁萬木正凋秋空谷音初到同袍賦足酬珠崖仍復漢玉壘亦宗周從此投天際羣雄好北謀

三過沙關

五載真如夢秦川恨舊遊地分山閩越天濶水沈浮鴻鵠難羈紕蛟龍空負舟包胥洵國士復郢更辭侯

沙關感懷

飄泊曾何濟蕭然一撫襟呼童刪白髮結客煉黃金擊水垂天翅依風縮地心得閒聊把卷非敢學書淫

送羅子木往臺灣

中原方卜鹿何暇問虹梁欲攬南溟勝聊隨北雁翔蠻帆天外落蝦島水中央應笑清河客輸君是望洋羽書經歲杳猶說衮衣東此莫非王土胡為用遠攻圍師原將畧墨守亦夷風別有芻蕘見迴戈定犬戎

辛丑長至舟次祝聖

朔氣行將盡今來復一陽書雲存珥筆挽日仗冠裳社稷千帆影乾坤一劍芒微臣無限恨稽首儼天王歲華方剝極何意泰重來國脈真如線天心未似灰山呼愁節禿海晏待槎迴賴有黃鍾動梅花雪自開

元夕金鄉道中 壬寅

海苦波俱惡春陰氣倍寒征帆渾出沒窺鏡儘闌珊燈謎憑諸
賭碁聲讓客彈勞生兼浪跡節物肯為歡
最是蹉跎恨都從此夕來幾年春爛熳共月影徘徊每擬銀鈎
滿當看玉燭開逢時還寂寂辜負夜光杯

春心

滄江歲月深老去惜春心花到辛夷候人歸杜宇音聞眠避獨
醒繁恨寄孤吟天骨原蕭散能消許事侵

北回示將吏

利鈍甯能料孤軍又北回同仇計左矣遺老思深哉破斧烝徒
義持籌參佐才古來忠孝事天地每相哀

顯甥奔至

壬寅

初聞購孺子何幸脫蘆中執手哀吾姊囊頭並若翁死生盡一
別忠孝已雙窮淒絕青山外鵲啼血倍紅

聞家難有慟四首

仇國言終驗衰門祚亦危痛深惟骨肉老及受參夷白首青楓
暗黃腸廣柳遲百端交集處能不碎心脾

家破原因我何堪玉並焚亢宗空有子函夏已無君左袵興亡
決南冠生死分拊棺猶未得揮淚結玄雲

孤竹行吟後家無四壁存更聞宗欲墜不但族先燔蹭蹬孤臣
節踉蹌老子魂原為雙白鶴飛去叩天閭

言不陸等
淫威何太甚原外鶴鳴空擬班昭疏甘成聶政名肝埋有處
士腸斷是零丁遙識胥江路霜飛獨滿城

贈陳文生侍御返命閩嶠二首

益部今何似孤懸一使星滿思匡漢室虛擬乞秦庭鶴立孤臣
淚龍潛舊主靈侶予還和汝天夢儻然醒
恨別還如昔憂危較獨多孤槎偏跼踖故節已蹉跎羽翼猶吾
否鬚眉奈爾何南陽雄雉在努力向滹沱

五言排律

閏元宵排律十四韻 己亥

獻歲杓頻指良宵箭獨稠東皇添玉曆南陌駐銀鈎莫葉應雙
吐椒花已兩浮小年燈市永午夜漏聲悠月令初中節風光第
幾籌蟾輝看倍皎鶯語聽全流復可傳柑會偏宜秉燭遊流黃
連夕怨拾翠隔句愁柳弱先披拂梅寒故逗遛乾坤分正閏夷
夏辨春秋只此尊天統因之念帝憂耗磨何足論伏臘豈相謀
金鑰方重闢銀鈎肯再籌香塵冉冉去歌吹幾時收

五言絕句

海月

海嶠看明月蒼茫練影多不知鄉國夜皓魄復如何

夜泛

秋雲何淡淡影入夜波清倒作銀河看依然星斗橫

舟行望野燒

朔氣偏蕭瑟千山落木聲征帆殘照外隱隱見孤城

上巳舟中

不解芳菲節人傳上巳時何須修禊事早是弄濤兒

讀史

故人即非寒使者殊不薄交滿天地間綈袍何落寞

古體

秦吉了 辛卯

秦吉了生為漢禽死漢鳥塞南塞北越禽飛悵望故山令人老
載鳴鳴華音載飛飛華土翮折翅垂夷敢我侮 生當為鳳友
死不作雁奴我自名禽不可辱莫待燕婉生胡離 鳶猶嚇鵲
徒惜倉庾空格磔哀哉不能言起視來禽當嘆息

枯魚過河泣 丁酉

枯魚過河泣道上陽侯揖此方介族難與立

春暮有懷 戊戌

嗟予初衣柔翰勃窣國難驅人衽金袖鐵日月昭馳踰地躋天

言
二石
汎汎滄海盤桓小年薄暮酒散愴焉彼美安得九還以度靈紀
山川窈窕爰奏素琴琴言維何寫此春心

泊馬蹄壘戲成 己亥

問馬蹄春風陌上走銅鞮誤被秦皇驅入海玉勒金鞍不敢嘶
龍媒自是波間種何用天閑錦障泥

笑馬蹄骨亦千金志千里追風逐電何處來恰與鯨鯢鬪江水
安得飛騰去渥洼依然負圖見天子

促織

促織促織微吟閨夕緯婦驚秋停機太息織縑苦疏織纈苦密
萬縷千絲織不成匹

七言古

滄州行

自從錢塘怒濤竭會稽之棲多鍛翮甬東百戶古滄州居然天
塹高碣石青雀黃龍似列屏蛟螭不敢波間鳴虎鬚爭如秦婦
女魚旄半是漢公卿五六年間風雲變帝子南迴開宮殿繇來
澤國依樓船烏鬼漁人多不賤堂怡穴鬪幾經秋胡來飲馬滄
海流共言滄海難飛越况乃北馬非南舟東風偏與胡兒便一
夜輕帆落奔電南軍鼓死將軍禽從此兩軍罷水戰孤城聞警
早登陣萬騎壓城城欲夷砲聲如雷矢如雨城頭甲士早瘡痍
雲梯百道凌霄起四顧援師無螻螿累創奮呼外宅兒誓死痛

哭良家子斯時帝子在行間吳淞渡口凱歌旋誰知勝敗無常
勢明朝聞已破巖關又聞蒼戰戈旋倒闔城草草塗肝腦忠臣
盡瘞伯夷山義士悉到田橫島亦有人自重圍來向余細說令
人哀椒塗玉葉填胥井甲第珠璫掩劫灰而今人民已非況城
郭鬪體跳號甯復肉土花新蝕遺鏃黃石苔早繡秧新綠嗚呼
問誰橫驅鏃兩襠翻令漢上翦龍荒安得一劍掃天狼重酌椒
漿慰國殤

舟艤行癸巳

乘舟艤載餘艤掙鉦搥鼓走風檣滿船兒郎抹額黃人言若輩
真鷹揚饑則攫人飽則颺江邨鷄犬絕鳴吠老稚吞聲泣道旁
罄我瓶中粟使我朝無糧斷我機上苧使我暮無裳我亦遺民
事耕織當身不幸見滄桑入海畏蛟龍登山多虎狼官軍信武
何不恢城邑願輸夏稅貢秋糧

寄紀石青乙未

憶昔公車歲在午太乙飛精挂河鼓閩南紀生豈其儔搏風遂
奪吳剛斧余亦持鋒起越中謬於文章稱跋扈乾坤排蕩會有
人日月沈淪忽無主言也左袒一奮呼五千甲盾色如土斯時
寓縣望漢官君獨躬耕吟梁父終孀不棄意何深賈組長擢節
殊苦迨余收燼赤董山錫涸銅乾抑何補低眉始作下邳遊屈
指誰向中宵舞短衣皂帽乍相逢濁酒素筭安足數玄理能令

萬象開鴻文直起三墳吐別來國步尚滄桑藉甚襟期在幹蠱
聞君曳履近夔龍笑余袂衣逐罷虎寂寂溫劉竟屬誰悠悠絳
灌徒為伍甌越玄雲自卷舒句吳落月空分割何時功成歸去
來重與尊前說破虜

長鯨行

南海長鯨何橫絕吞波濤噴日月鼓鬣俄成赤羽旗批鱗都變
黃金穴初依海市現樓臺旋上天關守宮闕天狼忽從西北來
旌為蚩尤鞭為孛長鯨稽首稱波臣玉皇香案皆羶羯希恩豈
望鳳凰池論功欲乞蛟螭窟那識狼心最不仁組繫長鯨離溟
渤跳甯復昔睚眦涸輟應憐舊饕餮長鯨有子類龍種起伐靈

鼉震列缺銀河朝犯織女機珠浦夜泣鮫人血天狼跋躑還叱
嗟僉謂鯨鯢本遺孽疏屬山頭貳負屍鍾離村內嵩車骨殘魂
幾處聽蒲牢遺醢何年化彭越嗟嗟長鯨爾何愚如彼異類空
屈節神龍不臣臣貪狼抉目屠腸坐自滅昨夜星纏弧矢明却
喜橈槍影欲没天狼天狼莫漫驕海宇會有真龍出

楊芳生以徐閣公高弟浮海來晤於東甌爰贈一章

楊生美髯白接羅來自雲間映少微自言年少曾問奇南州高
士則我師南州迢迢不可極且去杖藜看山色永嘉山水稱妙
絕君獨掉頭噴耳食既疑雁宕構虹橋復怪龍湫翦鮫綃著履
扶筇何太苦丹崖翠嶂枉相招古人相馬惟相骨今君看山但

看笏想君胸中自有五城十二樓安用崑舞鸞飛之突兀楊生
能酒復能棋酒亦不問賢聖棋亦不辨雄雌左手一枰右一卮
掀髯大噓誇兵機兵機無過古遁甲君已稍稍知涉獵願君持
此覓封侯男兒豈肯長彈鋏君家子雲太糊塗那曉春陵赤伏
符今君不向玄亭老差勝當年莽大夫

歲在戊戌余行年已三十九矣撫時感事遂以名篇

人生百歲安得有我今草草三十九猶憶中原蕩赤風結束辭
家歲在酉銀魚嘗挂鍊襖襠金馬長懸玉匕首江東霸氣歛蕭
條純鈎繡澁沉槍朽縱橫露布浪飛書突兀星槎莽犯斗風雲
縮朒帝應嗔日月膏盲鬼亦吼丈夫意氣豈動名何況文章等

芻狗頭顱如許可奈何慷慨悲歌還自詒太史公牛馬走鯨涎
蛟沫日攢眉虎符龍節憑誰手擲揄齷齪里中兒纍纍黃金竊
佩肘帶礪山河安在哉五侯空縮龜文紐自昔英雄多妙年隆
中圯上相先後如彼南陽鄧仲華丹青獨畫雲臺右其人鬚眉
尚宛然咄咄微軀真做帚古來何代無廢興雌伏雄飛更某某
上不為富春澤畔羊裘翁下即為山中宰相天子友不見故侯
原上瓜請看徵士門前柳誰能出處兩無憑躑躅千秋嘆鷄口
莫論兵且飲酒今人爭羨古人賢後人亦羨今人否

壽鮑淵張相國

扶桑之國蓬萊鄉日月所胎生氣長遙與九峰三泖接神仙窟

言
宅天地房乃有格人降箕宿兵甲胸羅腸篆籀鳧鳥先從闕下
飛鷹冠獨向殿中驟天右膚公為洗兵朱旂玄鉞仗南征日轂
朝扶辰極正星鉞夜掃彗躔平乾坤有待銅馬帝制闡旌旄橫
海濟蚩尤欲殄夢吹塵胥靡爰登歌作礪丹心洞達八窗開黃
髮溫恭萬厦恢謝棋墅上時時賭狄李蹊邊處處栽先生花甲
今復始考擬中書二十四鼎內和羹手自調馬用金鹽與玉豉
况對仙山咫尺間徐市曾尋大藥還避芥子真丹井在安期醉
墨桃花斑卓哉先生能壽國鼇柱孤擎挽百六虞淵倒景浴咸
陽上台含曜融寒谷君不見吾家三戟世風流杖履從容燕子
樓自是綸扉同瞰蔗何須海屋別添籌又不見漢興正賴子房

策封留高蹈求黃石世間更無却老方不朽功名綿史冊宗風
千載先生存轉軸旋樞裕後昆婆婆彌覺朱顏駐園綺衣冠安
足論

鴻門歌

項王怒漢王畏鴻門宴罷鴻溝潰漢人喜楚人恚玉玦謀空玉
斗碎重瞳隆準兩英雄天意有興必有廢成豈噲也一羸肩敗
或亞父疽在背不殺沛公豈云誤此事恰有霸王度當時長者
號漢王俎上老翁不相顧既無父子况君臣三軍縞素為何人

賦贈琴師

入夏園林長新綠小庭疏雨黃梅熟主賓雜坐觴數巡清言玄

論驅煩煥座中有客伯牙儔起撫瑤琴弄寒玉初彈秋意瀟瀟
湘再彈忽唱陽關曲揮絃振軫轉繁音往鶴來雲節更促我聞
三湘烟景自蒼涼淚痕斑斑猶在竹得君譜入龍門桐無數離
情紛相觸况復驪歌織指間羈人聽之淚盈掬願君翻作洞越
聲莫怨孤鴻與寡鷓君不見少文動操響衆山又不見中散絕
唱廣陵寒寥寥千載同調難今遇知音為一彈

閩南行

閩南自古龍蛇孽犬羊闖入為窟宅元公仗越起海東劍躍蛟
涎兮霹靂一戰築京觀再戰羣椎結三戰合圍漳州城萬竈星
羅盡樹柵是役也彈丸小醜尚陸梁登陴不畏河魚疾回首百

雉蚤懸燈照耀闐闐光為赤城頭刁斗寂不聞惟聞死聲動篳
篥我軍鼙睡聲如雷戰馬高嘶待橫擊平明兩軍仍相持似惜
人命膏鋒鏑嗟嗟狡虜何其愚奚不肉袒轅門行自絕惜昔秋
深胡馬肥燒荒獵火天成血橐駝九陌換銅駝指顧中原少堅
壁不數年間殺運回漢人復熾胡人滅區區阱獸與釜魚天戈
所指應無敵應無敵多獻鹵獲或獻俘或獻馘此時龍戰血立
黃功成誰念溝中瘠兵家奇正鮮常形頓軍堅城豈善策試籌
遁甲探陰符大武何嘗窮矢石

苦雨吟

商聲八月何勃窣破雨兼旬復泥滑魚腸寂寞生紫鱗鷓首依

言
稀長綠髮榜人停橈且卧蓑天公倘或倒銀河萬里陰霾猶未
掃霄漢飛騰奈我何

辛丑秋虜遷閩浙沿海居民壬寅春余艤棹海濱春燕來
巢於舟有感而作

去年新燕至新巢在大厦今年舊燕來舊壘多敗瓦燕語問主
人呢喃淚盈把畫梁不可望畫梁檻聊相傍肅羽恨依棲啣泥
嘆飄揚自言昨辭秋社歸比來春社添惡况一片靡蕪兵燹紅
朱門那得還無恙最憐尋常百姓家荒烟總似烏衣巷君不見
晉室中葉亂五胡烟火蕭條千里孤春燕巢林木空山啼鷓鴣
古今胡馬仍南牧江村古樹窳鼯鼯萬戶千門徒四壁燕來亦

隨檣上烏海翁顧燕且太息風簾雨幙胡為乎

五言古

寄懷徐闇公

甲午

蹇余信姱脩始服遘天步擾擾風雲馳念之徒心怖四海選交
游椒蘭漸非故會合總泥塗乖違隔衢路所貴膽與肝在遠彌
相附寒江已腹堅鴻雁莽南驚太息物候遷含情託毫素
黃鵠翔漢表厲氣何崢嶸朝食方壺寶暮掇圓嶠英網羅不得
挂稻梁安所馨俯視滄溟流驕語鷗與鵬萬里毋乃隘千仞奚
足驚豈意彌天罨礙爾莫長征明時重儀羽雲路詎冥冥

妬婦津

乙未

妬婦死津頭津亦名妬婦少女相經過風雨不得渡或為蓬垢

顏竊恐逢彼怒古云粥倉庚可以療此痼惜哉彼婦愚雖死猶弗悟

孤相吟

孤桐產嶧陽百尺巢風雨時作白龍吟天然發宮羽斷為爨下材遂與棗栗伍中郎秉玄鑿勿因積薪阻飾以琬琰姿摩挲一再鼓清聲洞天地神物炫今古士誠貴知音此道已如土

薤露吟戊戌

赤風蕩海宇弱水羣飛揚日月長麗天中有蓬萊鄉桓桓國虎臣據圖畫封疆火生木必焚害金自相戕屏藩遂已撤干戈及寢皇白日竄野馬黃昏號國殤貴賤同一骨誰為送北邙

蒿里曲

猛獸在深山藜藿亦壽考况也濟亂荒干城國之寶一朝捐賓客三軍哭孤島李代桃亦僵崩易絲逾擾吁嗟周遺民去作流離鳥路逢故鬼語死生何草草野死媚烏鳶水死蛟螭飽哀哉失所天人命不自保

吳佩遠遊雁山歸備述名勝因為詩紀畧亦志余企望之懷也

名山繫慧業遐覽情亦怡恭聞永嘉勝拱揖乃失之吳子骨森秀獨往良所私白袷破蒼煙短筇橫指麾歸來氣色驕嵐光生鬚縻折磬前問訊抵掌登眺奇雲根插萬笏一一攀青霓梯霞

轉磴道象妙來參差靈巖割元氣陰洞礙朝曦巖中何所好萬
象迸威蕤林立丈人峯高冠肅威儀危岑古今形容箕踞各隨宜
洞中何所妙複道夾軒墀宛轉石竇間髣髴陰風吹居然天地
房日月安敢窺更復捫浮屠寂觀豁天機老僧相候門為告山
靈疑飛柯攢石棧叢棘闕天池所以迴雙屐恆懼鬼物揮但見
飲長虹蜿蜒挂翠微時或展湘簾散作千珠璣聞言殊嘆惜兩
腋生寒颺豈無濟勝具而為塵鞅羈拍手問愚公茲山詎可移

苦飢 己亥

登彼三神山慨焉思霞舉蘆荻風蕭蕭白石不可煮絕粒固所
宜躊躇傷徒侶驥首視烏鳶青天嚇腐鼠不念山中人鉗磬亦

壘恥豈乏稻梁謀卑棲因鍛羽安得有蕨薇療飢待明主

歸思寓郡望姓氏 丙申

兵甲被天來兵燹亦改氣中田一揮手十年悲捐棄 四 晞髮扶
桑津希踪渺無儷胡為歲寒心古今迫自異 明 弦月挂霜空立
禽沒雲際悵悵嘆余行人生竟安寄 張 交遊漸已乖父書將終
廢幼稚儼成行刀環徒縈繫 立 等身五嶽間寸土焉留滯睹物
起離情目斷歸鴻易 著

述懷二首

王室方板蕩萬里颺悲風南紀亦滔滔島嶼有羣雄羣雄苦不
成歲月坐冰融五侯並九伯化為蒿與蓬樓船出閩越軍聲正

言
及鋒金符剖異數玉牒級強宗匪云優晉錫所以厲康功孤雲
懷共主髣髴五雲封九關踞虎豹閭闔不得通迴槎天漢際躑
躑依王公顧念命卿微一旅甘附庸蒙恥期匡濟敢言蹇匪躬
但慮踪跡異復慮踪跡同悠悠千載下誰更想孤忠

弱齡尚遐異辟穀慕青鸞骨月相驚涕時復勸加餐因緣誤烟
火塵鞅日以攢上書獻天子索米走長安羲和忽西匿烽燧起
樓蘭萬古有綱常肯為廢興寬橫戈希雪恥屹柱誓迴瀾原歎
富貴氣終鮮妻孥歡蕭然世外味曾無九還丹仙靈重名教忠
義固其端所惡精已搖何以生羽翰神理倘不滅無勞白玉棺

懷古二首

我懷申大夫哭秦申復郢人定能勝天一言重九鼎亦有張長
史唐室賴藩屏當其語江中籌畫先井井古人秉忠貞謀國無
僥倖操此左券言勳名終彪炳如何逋播臣智勇不得騁廢興
甯有運吾欲訟青冥

雲本依龍翔風亦附虎烈古來王佐才遑遑待聖哲白水崖真
人乃能顯高密先主自梟雄隆中原蕩滌卓哉一臣靡赤手挽
禹厓澆泥既迭生鄴灌且並滅君方娠有仍臣乃奔有鬲國亡
四十年興滅復繼絕祀夏伊誰功萬古冠臣節

代內人獄中有寄

國破已飲泣家破復聞關自君之出兮妾發君亦鰥兒女雖有

情不在別離間上堂潔脯臍下堂代斑禰知君驅汗馬豈敢怨
紅顏夷官張羅網忠義委草菅奄忽大椿謝君滯滄海灣兀然
生死魂并作鮫珠潛君行寶膚髮奔跣安所還妾自感百罹飛
蓬任雙鬢衰門既零落空閨誰貞艱哀哉井白婦終年困控杆
非不輕微生將雛實且孱園扉滋味惡燐青碧血般古稱東海
婦嚴霜暑露斑胡天寶夢夢莫辨玦與環如何貫索星獨炤望
夫山視彼磨笄峰高名良可攀誰將妾巾幗來佐君羽綸報君
還祝君旂常樹人寰

擬答內子獄中有寄

成年不惜別客久始懷慚我非蓬蒿人江湖遂屢淹况復避豺

虎誰能解征衫孤雁自西來彷彿墮書函書中寄珍重書外淚
重緘恍見閨中秀吞聲寫素練卿今蹈虎穴雙魚何從探珊珊
魂魄來關河諒非諳棘林魍魅鄉骨肉各生嫌稚子亦囊頭狼
狽形影兼憶我初行役兵戈未解嚴驅馳悲九折輾轉歲華添
白雲空繚繞長此傷烏啣水鷗雖忘機安得此鷓鷯名教自束
躬柔情非所耽憐卿持門戶鼎俎心已甘豐獄有埋劍紫氣若
烟炎莫邪獨掩抑干將慘不銛神物庶終合造化焉能殲生當
挽鹿車死當駕雲驂

贈別陳文生還三山

平生重意氣定交在班荆忽忽經亂離風雨晦雞鳴得友炎洲

上傾蓋襟已橫一奏蘭薰曲相辭戒北征青峰千萬仞家枕古
榕城將歸省松菊甯復猿鶴驚瓊瑤鮮雜佩何以贈君行屋梁
一片月三山兩處明珍重陳孺子善刀待漢興

口廷以余倡義既久屢復名城遂逮及族屬且開告密之
門波累親朋撈掠備至聞之泣然壬寅

宗國既飄搖家門遂顛覆感此多難心飲泣不成哭我生實數
奇乾坤方百六揆揄滿中華赤靈社已屋孤臣骨可糜豈敢惜
孥戮所悲諸父行斑白嬰三木女兒與所天株連遭荼酷幸或
作流人否恐登鬼籙稚子竟何辜千載尚淹獄他儔有寡妻墨
幪兼緇幘國亡家亦亡我固甘湛族邇聞告密風舊遊復被錄

白虹慘欲垂黃金貧莫贖天地豈不寬誰念忠之屬惟應千秋
名芬芳追王蠟破涕慰親朋安知此非福

奇零草後跋

盛世之音和以平衰世之音哀以促此言聲音之道與天運通也維詩亦然吾郡張玄著先生當天步艱難之世從亡海島志在中興自丙戌至甲辰二十餘年間飄泊於波濤颶浪之中竭蹶於干戈顛沛之際履危蹈險辛苦萬端宜其音之哀且促矣而今觀奇零草所載文辭和雅氣韻平舒有從容瞻就之風而無淒颯倉皇之態有慷慨奮起之情而無卑靡挫折之念至若興趣所臻風流跌宕冠裳所集意象崢嶸覽厥體制有直追嘉隆盛時諸作者何其音之不類也噫我知之矣昔者典午凌夷江左繼祚新亭之會四座興悲而王茂弘獨曰當共戮力王室

言不...
恢復中原奈何作楚囚狀玄箸之意蓋在於此推其志直以明
室中興可操左券故家亡而不悔身喪而不顧雖王謝偏安之
業猶不屑言詎肯以德祐諸君子自况耶發諸歌詠固宜與盛
世同符而天心夢夢力不從志豈其始願哉夫人以詩傳者王
維儲光羲之詩非不名家而本領未正忠義之道微矣詩以人
傳者淵明之飲酒臯羽之晞髮千載而下讀之猶沁人心脾今
於奇零草亦作如是觀若王李鍾譚各標壇坫中雕蟲小技之
論耳未可為忠義者道也是集乃先生所親錄殉難時一兵卒
得諸匣中友人某以重賄購藏之余借閱手抄且次第其歲年
將以傳諸不朽也歲在甲子中秋日奠邑秦川題



三

11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47 48 49 50 51 52 53 54 55 56 57 58 59 60 61 62 63 64 65 66 67 68 69 70 71 72 73 74 75 76 77 78 79 80 81 82 83 84 85 86 87 88 89 90 91 92 93 94 95 96 97 98 99 100

